

TUSUN PENDIAU

Benedict Sandin




BORNEO LITERATURE BUREAU

TUSUN PENDIAU

Ditulis

BENEDICT SANDIN



BORNEO LITERATURE BUREAU

© BORNEO LITERATURE BUREAU, 1966



Dichelak

SOUTH CHINA MORNING POST, LIMITED
HONG KONG

JAKO PENGARANG

Nyadi julok ati aku ke ngarang ripih pengawa bansa Iban ari iya disera ka indai ngagai hari iya dipendam, nya kena aku madah ka ripih pendiau kitai kenau ari ada datai ka parai. Maioh sedak utai enda kena putik dalam buku tu, baka pengawa lelaki enggau indu mansai, nubai, ngasu, beburu, nyarin, madal enggau besumpit ka jelu enggau burung ka dalam kampong. Kabuah alai aku enda nyilik ka samoa pengawa nya, laban nya pengawa redak lalu tau dikereja kitai sabarang maia.

Ari pemaioh utai ti kena sebut aku dalam buku tu, lebih agi baka niat ati lelaki enggau indu rambau kalia dia kitai pemacha merati ka utai ke diniat ka sida iya rambau menoa kitai tu agi jerong agi kampong. Enti sida ngayau lalu bedengah laban leboh nya apin bisi bintang diberi ka tanda berani, sida enggai enda mai pala mensia pulai ka rumah ngambi ka tanda sida udah munoh munsoh. Maia pegi leboh sida bisi jereki, sida enggai pulai ngapa ka rumah, enti wang ka ulih sida nya enda dibeli ka tajau, bedil, satawak, babendai, engkerumong, guong enggau raban baku labu temaga ngambi ka bisi nyadi pesaka bilik sida. Ari sida meli utai baka tu ari nya mega sida tulih ka tanda ti enda tau burok kena ngelai pemegi diri lalu bisi reti.

Tang kamaiatu samoa utai ke diulih ka sida maia nya kalia nyau enda diniat ka dunya agi, ti ngasoh samoa reta nya nyau nyadi ka pesaka bilik bansa Iban aja. Utai diguna dunya kamaiatu nya ngiga pemandai ulih ari belajar dalam sekula awak ka tau landik gawa ngidup ka diri baka bumai betaun, bekebun enggau betupi, bedagang enggau bempu ka penemu ti dalam awak ka tau enggau orang merintah menoa kitai empu.

Nyadi jalai kitai ngulih ka utai baru ke disebut aku datas nya mega berguna ka pengeih ati, pengeras, pengarajin,

enggau pengeliat enda tau enda dikembuan ati kitai, enti kitai deka bulih samoa utai nya enggau mujor, nitih ka pemujor sida ke kalia ngulih ka utai ti besai 'ba ati sida rambau nya.

Ka pengujung kenang aku ditu, aku enggai enda meri basai terima kasih ngagai pangan aku tu ti udah enggau aku berandau lalu betungkap ka jalai pendiau bansa Iban, baka Mr. Bidui anak Kalanang, Matop, Paku, Mr. Juing Insoll, Padih, Layar, Mr. Kawi anak Penghulu Chaong, Sabelak, Roban, Penghulu Ugat anak Muli, Tanjong, Paku enggau Mr. Tom Harrison, D.S.O., O.B.E., Curator, Sarawak Museum. Pia mega aku enda tau enda meri kenang ti naka iya ngagai Mr. Bugak anak Duat ti udah meri aku sakeda jako berambai ti dikeluar ka dalam buku tu.

BENEDICT SANDIN ATTAT

Kuching.

ISI BUKU

Batang Cherita

1. Ngandong Enggau Nyera	1
2. Bepenti	1
3. Beranak	2
4. Bekindu	2
5. Nengkadang Hari Enggau Ngetup Garam	3
6. Ngaga Nama Anak	3
7. Meri Anak Mandi	4
8. Di-wa	6
9. Minching Labu	7
10. Ngangkat Ka Diri Bujang Enggau Dara Biak ..	7
11. Belaboh Belajar Gawa	8
12. Berengkah Belajar Nganyam	
13. Ngangkat Ka Diri Bujang Enggau Dara Bendar ..	9
14. Indu Berengkah Ngikat Enggau Ngebat Lelaki Berengkah Gawa, Pegi Enggau Ngayau	10
15. Basa Rama	11
16. Basa Pendiau Bujang Enggau Dara	12
17. Penyiru Anak Lelaki	12
18. Penyiru Anak Indu	15
19. Bebini Belaki	17
20. Basa Enggau Mentua Enggau Ipar	43
21. Basa Makai	45
22. Basa Mansa Moa Orang	45
23. Basa Enggau Temuai	45

24.	Basa Leboh Merau Enggau Pegi	48
25.	Basa Enggau Tuai Bansa	48
26.	Betenun	49
27.	Bumai Betaun	51
28.	Pengawa Redak	51
29.	Main Enggau Uti	51
30.	Sakit	55
31.	Mati	55
32.	Beserara Bunga	61
33.	Ngetas Ulit	62
34.	Ngambi Tebalu Mata	63
35.	Tebalu Mansau	65

ANAK MIT

NGANDONG ENGGAU NYERA

NYADI TERUBAH indu nemu diri deka betuboh bisi tauka ngandong nya leboh iya ngasai ka diri badu datai kain. Ba bulan siti ti nangkan ka nya, enti iya nadai ga datai kain nya baru iya tentu nemu diri ngandong. Iya pen lalu belaboh ngitong bulan diri ngandong ari bulan ke terubah iya nadai agi datai kain tadi. Pia mega sereta kandong udah lega, indu pen lalu berasai nyera. Leboh indu nyera iya tetengok ka maioh macham utai dempa lebih agi baka buah masam.

BEPENTI

NYADI LEBOH kandong iya udah datai ba tujoh bulan nya baru indu nya enggau laki iya berengkah ga bepenti. Seduai iya mali ngetas randau atas ai tauka atas jalai enggai ka indu kelalu begetah leboh iya beranak. Seduai iya mali nakat ai, mali ngarut, mali nampun ka bubu, mali mantang ka paku lawang enggai ka indu mar beranak. Indu mali ngelilih ka minyak ngagai tapa lalu kena ngeminyak pala enggai ka anak tuli. Seduai mali ngentak ka ulu duku enggai ka anak bengal. Seduai mali natok telu manok enggai ka anak buta. Seduai enggai nanam pisang enggai ka pala anak besai. Seduai enggai munoh jelu, burong tauka ular enggai ka anak menawa sereta enggau deka bedarah idong. Seduai iya enggai ngikis tachu enggai ka anak enda tumbuh bok. Seduai mali bilik tama lelabi enggai ka anak ngeram enda ada. Seduai iya mali narum enggai ka anak ada chelum. Enti indu nya bejalai ka bukai, nya jalai iya mansang nya ga jalai iya pulai enggai ka anak tesut jalai ada. Seduai iya mali makai utai dalam kibong enggai ka beranak mengkang. Seduai iya mali ngema batu enggai ka anak tungkut. Seduai iya mali megai

bangkai enggai ka anak menawa luput. Uдах anak ada tang indai agi bisi getah dia apai iya mali nyilup tudoh enggau mali nakat ai. Sereta indu uдах beranak penti pemali bukai enda mali dikereja agi ketungkah ari pemali ti besai agi ngagai maia anak mit nyau tau maut kaki diri, nya baru penti pemali abis.

BERANAK

Pengelama indu ngandong semilan bulan semilan hari. Sereta anak nya ada, orang ti ngulu kia ka lalu nutong ka papong tengkiong, tang kamaiatu nyau ditimbak ka senapang. Kabuah iya pia laban ngambi ka anak nya beseregah lalu nyabak. Uдах anak ditetak tali tampok tauka temuni, iya lalu diberi mandi, uдах nya lalu dibedong. Uдах tembu medong iya, nya baru iya digali ka lalu dikujok ngena pua kumbu.

Leboh orang ngintu anak mit dia indu bukai ke endang masai ngintu orang beranak pen lalu maut perut indai iya. Uдах sida tembu bepaut, nya baru tuboh iya serap diunsut sida enggau lia, uдах nya baru malut enggau balut tekalong.

BEKINDU

UDAH IYA tembu balut nya baru orang nudok ka iya bekindu. Sereta baru dudok, iya lalu disapi enggau asi tiga suap. Sakumbang iya ke bekindu, utai dempa iya kena ngulai asi nya salai ikan, paku kubok enggau buah pulor, tang samoa lauk tu digulai enggau ai lia magang. Ai tauka lulun lia pen dempa iya mega ngambi ka tuboh iya angat.

Nyadi pengelama indu bekindu empat puloh satu malam. Nyadi jalai orang niap malam iya bekindu, tiang dichunting sida enggau kapu. Kabuah alai ngaga kelai ba tiang, laban kalia Iban nadai hari bulan. Nyadi kamaiatu laban samoa orang nyau

udah nemu nyurat magang, nya baru sida ngitong malam ngena hari bulan baka jalai bansa bukal. Nyadi unggun kena indu nya bekindu nitih ka menoa endor iya diau. Enti indu nya diau di menoa ulu, iya diasoh ngena unggun kayu malam, unggun manding tauka lensat.

NENKKAHAH HARI ENNGAU NGETUP GARAM

Sereta tali tampok udah tingkil kira empat lima hari udah anak mit nya ada, nya baru iya dibai ini iya tauka indu ke tuai agi umor dalam rumah nya pansut ka tanju ngambi ka iya nengkadah hari. Leboh nengkadah hari dia anak mit nya lalu dichulit ka indu tuai nya garam ba mulut. Uдах nya baru indu tuai nya nyampi munyi tu:

“O hoi! Ni nuan Petara, ni nuan Ini Inda rabong menoa, Ini Inee rabong hari. Ni nuan Serangindit ke ngaga langit mesai buah embawang lanja, peda, tela, jaga, kemata ka uchu kami tu. Beri iya pemidik, beri iya pengelansik, asoh iya benama, asoh iya beberita diau di menoa. Asoh iya gerai, asoh iya nyamai, asoh iya kaya, asoh iya raja. Gayu meh iya tu ko Sentuku, gerai ko Selampandai, nadai apa nadai nama ko Petara.”

NGAGA NAMA KA ANAK

Nyadi kalia Iban enda beguai ngaga nama ka anak. Sakumbang anak nya agi mit iya dikumbai Ulat, enda nemu ka lelaki tauka indu.

Leboh apai indai ngaga ka anak sida nama nitih ka endang adat Iban kenrau ari kalia madah ngagai kaban apai indai enggau aki ini bilik sapiak, awak ka ngiga nama aki ini ke udah parai, ka diangkat ka nama anak Ulat tu. Nitih ka adat Iban sida ngangkat ka nama aki tauka ini ti apai tauka indai orang ke

ngada ka anak nya, kaban patunggal aki ini sida nya. Sida enggai bendar ngangkat ka nama aki ini ti jai pemat i baka mati gila, mati munoh diri, mati makai tubai, mati beranak tauka mati telih, mati laboh enggau mati tangkap baya.

Udah nama dua tiga iti dipilih sida ti ngaga iya, sida lalu numpok ka tumpok asi nitih ka pemaioh nama ti kena pilih. Tumpok asi nya diengkah ka sida atas papan nitih ka nama ke udah di-pilih nya tadi. Uдах nya sida lalu ngasoh manok tawai mantok milih nama ba asi nya. Nya nama kena pantok manok, nya meh lalu ka nama anak nya.

MERI ANAK MANDI

UDAH TEMBU meri anak nama dia apai indai iya lalu berunding deka meri anak sida mandi ka ai ka enggau rami enggau richah, Kabuah pia enti anak nya apin diberi mandi ka ai ka ngena piring ngena ading, iya apin tau dibai mandi ka ai ka ngapa. Leboh sida deka ngereja pengawa tu, lemai kejang pengawa deka dipenyadi, apai iya enda tau enda ngempuru ka sida sarumah ngagai ruai iya madah ka diri deka bisi pengawa. Sida sarumah nya pen lalu diasoh diau magang ga hari siti awak ka sama enggau ngereja pengawa. Enti orang bisi bemalam diumai, sida nya pen diasoh pulai samoa.

Nyadi pagi siti agi tumu hari alai orang belaboh nurun ka ai. Ngenulu ka bala sida nya orang ti nyan menira. Iya lalu ditangkan ka lelaki siko minching manok. Nyadi seduai tu dipilih ari lelaki ti pugu kalu sida sarumah dia, laban orang ti nyan menira nya lalu diasoh mantap ai, lalu iya ti minching manok nya diasoh nyampi kejang ai deka dipantap.

Nangkan ka seduai nya indu dua iko bejalai betunda udi. Indu ke dulu mai piring ti diketudi ka indu ti nyandik anak mit

nya ngena pua kumbu belantan tauka lebor api. Nyadi seduai tu pen sama mega pilih ari indu ti peridi enggau bidik lansik diau nguan menoa. Nyadi bejalai nunda udi sida nya baru orang bukai ti enggau ka ai, ti lalu dikentudi ka orang ti begendang.

Sereta datai sida di ai, orang ke nyampi lalu nyampi munyi tu:

Ni nuan Seragindi ke ngaga ai,
Ni nuan Seragindah ke ngaga tanah,
Ni nuan Seragindong ke ngaga tanjong,
Ni nuan Seragindee ke ngaga hari,
Ni nuan Seragindit ke ngaga langit?
Nyadi pagi tu kami meri *sanu* tu mandi,
Nunda adat kita ke kelia ke menya.
Kami tu minta kita meri iya pemidik,
Meri iya pengelansik.
Ngambi ka iya betuah awak ka iya belimpah,
Diau nguan menoa.
Ni kita raja ikan, kita raja gemian.
Ni kita raja semah, kita raja tapah.
Ni kita raja lelabi, raja genali,
Kita raja adong, raja kulong,
Kita raja baya, kita raja gumba?
Enti anak uchu kami tu pagila lusa,
Bisi karam tengelam,
Leboh maia iya ke bejalai nemuai,
Kita nya meh tau nanggong tau melepong ka iya,
Ngambi ka iya pulai gerai pulai nyamai,
Nadai apa nadai nama.

Udah tembu sampi, orang ke nyan menira pen lalu mantap ai, udah nya manok lalu disayat iya ari ulu indu ke nyungga ka anak nya.

Leboh orang nyungga ka anak mit dia orang ke ngemata ka richah bendar. Gendang taja enda tentu dipangkong bendar leboh nya tang anembiak enti sida deka mangkong enda dirara, ngambi bisi kena mampul pending awak ke enda ninga burong manah tauka jai enti bisi bemunyi.

Udah anak nya diberi mandi, enti anak mit nya lelaki sayap manok sapiak ditanchang ngena benang mansau lalu dituat ka ba baur berayang. Enti iya indu laletan ga kena orang nuat ka sayap manok. Semak sayap manok nya tadi di engkah ka orang piring siti atas kalingkang digantong orang ari puchok buloh ti agi bedaun.

Tembu pengawa di ai, orang lalu pulai ka rumah. Sida ke pulai tu beripih baru baka ke mansang tadi lalu agi dilagu enggau gendang enggai ka ninga burong. Datai sida di rumah anak lalu dipanku indai iya dibai dudok atas satawak ba tengah ruai dibap ngena pua kumbu awak ka ditatap enggau ai. Nyadi ai kena orang betatap nya ai batu penabar burong, ai ringgit, ai tinchin mas engkah dalam pinggai besai.

Udah orang tembu natap anak seduai indai enggau ai penchlap nya baru orang lalu bempa ka penganan, tuak arak enggau macham pemakai bukai ke dikebisi ka sida. Udah tembu nya, nyau tengah hari nya baru orang lalu makai di ruai nya dikumbai makai diruai meri anak mandi.

DIWA

Leboh umor anak nya kurang lebih nyau manggai ba enam bulan, nya baru iya diwa aka tauka ini ti ngibun iya. Ba maia tu umor mega, indai iya empu nyau tau ninggal ka iya gawa ka umai enggau ngagai endor bukai ke enda bengat jauh ari rumah. Kabuah iya enda tau turun jauh laban anak nya enda tau enda ditusu ka iya.

Leboh aka tauka ini iya ngua anak mit nya, leka wa sida manah bendar nitih ka penau sida berua. Sida ngayu ka iya enti anak nya lelaki iya kering, jampat, regas, berani leboh maia ngayau mulau. Enti iya indu, sida ngayu ka iya pandai muntang, pandai nengkebang, landik ngikat landik ngebat ngaga pua laban nya endang rabong pengawa sida ke indu.

Sakumbang anak mit nya apin bisi adi, endang ka baka jalai Iban, iya agi tindok begulai enggau apai indai. Nyadi enti iya udah ngadi nya baru tindok enggau aki seduai ini.

MINCHING LABU

ANAK INDU baru tau dikumbai minching labu leboh umur iya datai enam taun. Jako tu dikena Iban bendar leboh orang nanya ka maia umur anak iya.

Nyadi anak lelaki enti datai ba maia nya umur dikumbai baru sirat-leka, reti nya ama deka besirat ama agi ga deka telanjai, laban iya apin tentu nemu malu.

Tang deh ba maia nya umur anak indu enggau lelaki agi saum main. Sida rindu besulu diri sama diri nyabong daun engkerajai, nyabong daun rian enggau nyabong daun bukau ba sabelah babas semak rumah tauka ditembawai.

NGANGKAT KA DIRI BUJANG ENGGAU DARA BIAK

NYAU DATAI ba umur sapuloh taun, nya baru anak indu belaboh tindok kadiri. Ari iya berengkah beserara tindok ari apai indai iya lalu digaga ka sida penindok ti manah bendar kena mandang ka diri bisi anak dara. Agi kalia leboh anak indu maia nya umur, enti iya anak orang ke tuai megai menoa, iya diumbong disadau dijaga kaban ulun sida ke indu. Pengelama iya diumbong bakanya nyentok ka hari iya nurun belaki.

Nyadi anak lelaki ba maia nya umur, iya apin nyerara diri tindok kadiri di ruai enti bujang bukai nadai tindok semak ruai sida.

Endang adat Iban kenya ari jeman dulu, enti anak nyau deka ngangkat ka diri bujang, iya lalu diasoh apai iya besunat. Pengawa tu taja iya enda tau enda dikereja tiap iko anak Iban ke lelaki, iya ukai pengawa di rami, tang dipelalai ka enggau bendar. Samoa anak lelaki Iban enggai enda besunat, laban sida takut ka diri di kumbai orang kulup.

BELABOH BELAJAR GAWA

NYADI ANAK indu enti umur iya udah manggai ba tujuh tauka delapan taun dia iya lalu mupok diajar indai tauka ini iya berapi, nutok enggau ngisar. Kabuah bakanya, ka satu, awak ka iya jampat tau nulong sida sabilik gawa, enggau kadua be-guai ka iya landik ngereja pengawa ti endang dikereja anak indu, kena iya ngidup ka diri empu kadudi hari ila.

Nyadi anak lelaki ba maia nya umur baru belajar ngerang-kang. Iya apin tau ngambi kayu, laban iya apin tekana ka kapak tauka beliong kena nebang, munga enggau melah kayu. Pia mega ari maia nya umur anak lelaki pen lalu belaboh nitih ka apai iya gawa ka babas, awak ka iya meda ka gaya orang ngereja pengawa.

Nyadi anak indu enti umur iya nyau manggai tigabelas taun nya baru berengkah belajar nganyam. Utai dulu dipelajar ka iya nya nganyam baka, nganyam raga enggau nganyam utai bukai ti mudah dipadah ka indai seduai ini ngagai iya.

Nyadi anak lelaki ba maia nya umur baru ngengkah ka diri belajar ngena kapak tauka beliong, di kena ngambi kayu.

NGANGKAT KA DIRI BUJANG ENGGAU DARA BENDAR

Leboh umor anak lelaki nyau manggai empatbelas taun iya belaboh ngemujang ka diri bendar. Leboh nya apai indai iya ngajar iya jalai basa, jalai jako siru, jako manah enggau orang buhai. Pia mega ba maia tu umor anak lelaki baru nguji kadiri enggau bujang ka tuai agi ngayap. Nyadi laban ngayap tu endang uti bujang enggau dara bansa Iban, nya alai jako di kena lelaki bebasa ka indu leboh ngayap enda tau enda dipelajar ka sida bendar. Sida enda tau enda bebasa ka balai orang ka dara, bebasa ka orang ke tindok nyangka orang bisi mimpi lalu naka ulih bejimat bejalai niti rumah orang. Nyadi enti sida jelas-jelas, ari penatai sida enggau jalai jako sida, indu ke besai ati nemu lelaki nya anak orang ke kurang ajar. Indu enda rindu ka tebiat lelaki baka nya.

Nyadi ari randau leboh ngayap maioh bendar lelaki mudah ka diri deka bebini indu, tauka mudah ka diri kia ka endang ari asoh apai indai iya nanya indu nya ka bini. Leboh ninga jako tu indu enda tau enda berunding bendar. Kada ka jako nya amat, kada enda semina deka ngulih ka tuboh iya aja. Nya alai ba nya indu maioh bendar meri penguji. Sida mudah ka diri apin deka belaki enti lelaki nya apin ngayan ka tanda iya anak lelaki. Baka tu tanda nya amat anak lelaki. Iya puas udah berambun ka nyawa pegi ka menoa buhai ngiga nama ngiga reta. Agi mega leboh munsoh agi maioh kalia suah bendar orang ke dara ngumbai diri enda belaki ngapa enti tapa jari lelaki nya apin dicherengga enggau darah tau ka apin di tegulun. Laban perangsang orang ka indu munyi nya, nya kabuah lelaki Iban kalia jarang enda pegi, jarang enda enggau ngayau, laban takut ka diri pedis bulih indu ka bini. Lelaki ti enda mindah ari rumah rambau orang ke tuai kalia, nya ka dikumbai orang buyan lalu tau masok ke kain indu. Sida nya mar bendar tulih ka indu ke belinsar begamal ka bini.

Nambah ka nya leboh anak indu nyau ngangkat ka diri dara bendar, enti bisi lelaki nanya iya ka bini, iya nyau tau diator apai indai iya belaki. Umor anak dara Iban selalu diator belaki leboh iya manggai bendar tujuhbelas taun. Leboh anak indu nya ngenara ka diri, dia indai iya lalu ngajar iya samoa jalai nyaga tuboh diri dara. Iya diajar enda tau enda nemu ngadu ka jalai basa enggau jako kena berandau enggau anak lelaki ti ngayap ngagai iya. Iya endang nemu mega endang adat anak lelaki ngayap. Tang bulih enggau enda tuboh iya, nya atas ati indu empu, laban lelaki ti datai ba tikai balai iya enda tau bulih kadiri enti ati indu enggau lelaki enda sama deka ka pangan nitih ka pemanah budi enggau kelakar anak lelaki. Indai iya ngajar iya utai tu belalai bendar, lalu enggau naka ulih iya madah ka reti lelaki ke deka nipu enggau iya ti mai ati bendar deka bebini.

Indu Berengkah Ngikat Enggau Ngebat, Lelaki Berengkah Gawa, Pegi Enggau Ngayau.

LEBOH ANAK indu manggai ba umur tujuhbelas taun dia iya diajar ini enggau indai iya megai ubong. Iya diajar sida ngikat ngebat kain ka mit agi nama laban nya mudah agi digaga.

Nyadi anak lelaki ba maia nya umur belaboh bisi ati deka ngiga penemu ari ninga ka randau orang ti tuai agi. Iya nyau deka belajar ka suku burung enggau mimpi kena orang ngangkat ka nama diri, enggau burung bukai kena orang ngayau enggau pegi ka menoa bukai.

Udah anak lelaki bisi penemu ulih iya ari berandau enggau orang ke tuai, nya baru iya meransang ati diri deka pegi enggau deka enggau orang ngayau. Iya nyau deka didinga orang bulih reta pulai pegi enggau pala ulih ari berani leboh ngayau. Kabuah alai anak lelaki Iban kalia bengat beguna amat ka tajau, bedil,

satawak enggau reta bukai, laban rambau nya duit nadai, lalu orang enti bisi kena salah kena ukom perintah, nama nadai tajau tauka perengka temaga kena betimbang, sida kena tutop. Dulu agi ari tu leboh bansa Iban agi kena pegai tuai bansa diri empu enti orang ke bepenyalah nadai utai kena betimbang, iya ke salah nya diambi orang jadi ulun. Pia mega beguna ka pala, leboh agi maioh munsoh kalia enggau leboh anak lelaki agi dikarap ka ngena pemerani nyaga menoa diri ari langgar munsoh, enti lelaki enda berani indu ke belambar belinsar enda tentu deka belaki sida.

Nambah ka pengawa dua bengkah nya anak lelaki ba maia nya umor mega nyau deka basemekih enggu diri ke sama sarebak landik beban, landik ngukir, landik ngaga samoa macham leman utai kena idup, baka landik ngamboh, landik ngarut, bebingkai, enggau deka mega nyulut bulih ari pangan diri jelu ulih ngasu beburu, ikan ulih nginti enggau nyala.

Ba maia tu umor mega anak lelaki nyau bebendar agi deka belajar betusut enggai ka enda nemu riph orang lalu bejako lejah-lejah, sida belajar ka adat umai, adat rumah enggau macham-macham adat kena diau dimenoa, datai ka sida enggai enda nemu pejalai bintang kena bumai betaun.

BASA ENGGAU PENYIRU

BASA RAMA

ENDANG KENYAU ari biak, anak lelaki tauka indu diajar apai indai enggau aki ini sida bebasa ka orang, lebih agi bebasa ka diri sarumah enggau jako tauka ngena ulah ti manah. Orang ti megai basa tu, nya orang ti bulih puji ke dikumbai nemu adat, laban sida megai penyimat basa tuai. Tang orang ti jegak, ke nadai basa, enda manah ulah enggau lejah-lejah bejako, sida nya deka kena bantah lalu enda dikerindu ka orang maioh.

Nyadi basa enda salah baka gari. Manah pen langkar tuboh mensia, enti iya enda diumba enggau pasok gari, enda ga gamal orang nya manah dipeda. Pia mega mensia, manah kaya tauka besai pen pangkat iya diau dimenoa, enti iya nadai basa, iya deka jadi baroh ba ati orang ti ngemata enggau bayam ulah iya. Nya alai laban tuai dulu menya megai runding tu, nya kabuah sida balat bendar mekal anak uchu sida enggau ajar ti chukop, awak ka sida bebasa ka orang enggau bebasa ka diri empu mega. Laban enti iya enda masa orang, iya anang nganti orang bukai deka masa iya ti nadai basa.

BASA PENDIAU BUJANG ENGGAU DARA

NITIH KA ADAT asal Iban, enda manah bendar anak bujang pemilik, besangkayau dibilik tauka tindok dibilik skalika disadau. Kabuah iya pia, laban anak bujang tu jadi ka punga laki rumah panjai. Iya diadang nyaga indu anembiak ari langgar munsoh, penyamun, penchuri tauka nyaga rumah ari penusah bukai. Nyadi enti anak bujang tauka lelaki bukai kelalu pemilik enda enggau patut agi, sida deka kena bantah lalu dikejako ka orang maioh. Bujang ke pemilik, enti iya bebini enda patut dipinta derian besai, lalu bakanya mega enti iya mati, iya enda tau diambi besai tebalu, kenu ko jako tuai, tau disua ka ari lubang penyengok. Pia mega anak dara enda ngena iya dudok nadai pengawa dikereja ba pantar, laban pantar tu alai balai anak bujang. Samoa anak dara ke ngereja pengawa tu dikumbai orang ngandak bujang tauka dikumbai orang bagau diau, ti deka dikejako ka orang ba pengawa nya. Endor anak dara diau enggau begelumu endang dibilik.

PENYIRU ANAK LELAKI

BELABOH ARI anak lelaki angkat bujang, apai enggau aki iya, ngajar iya siru diau, reti nya jimat cheremat ngereja pengawa enggau ngintu utai baik ka pesaka ditanah tauka reta dirumah.

Ba maia manggol iya diajar apai tauka aki iya siru ngaga pelasar manah ka, awak ka nyamai endor ngansah. Uдах tembu hari ngundang panggol, dunju langkau penebas asoh gaga iya manah ka, awak ka nyamai alai ngereja pengawa.

Uдах tembu nebang samoa ujong kayu enda tau enda direda manah ka, awak ka deka angus empa api leboh nunu.

Nyadi ba maia nugal tugong kebak enda tau enda digaga manah ka, awak ka deka angus silik empa api. Uдах kebak ditunu, samoa papong kayu ke enda abis empa api, ditunu baru enggai ka jadi ka sarang tikus, enti padi nyau bauh.

Nyadi ba maia belangkau, langkau umai patut digaga ganggam ka, awak ka nyamai alai mai bini anak bemalam gawa taun nya.

Uдах tembu nugal, nya baru iya diasoh beguai magari umai, enggai ka babi enggau rusa rembus makai umai. Leboh beramu ka pagar, iya diajar enda diasoh ngirit kayu tauka randau semak tisau umai, enggai ka ngulu ka kera ngaga penyai ba umai iya.

Sataun nya iya diajar enda tau makai utai bejalai tauka berdiri ba umai skalika ngeruyak utai. Pemali tu, mali ngulu ka kera magang ngaga penyai nunda iya ba umai nya.

Nyadi kejang deka ngetau lelaki siru bendar diasoh ngaga pelangka enggau bebingkai ka sintong, tauka ngamboh ketap enggau ngiga temeran ka tali ma kena ngetau enggau berangkut.

Uдах badu ngetau enggau ngindik tauka nungku, padi dijembui. Uдах mansau padi, iya lalu disimpan ngagai kulit kayu. Nyadi apin padi tama kulit kayu tauka tibang, tibang nya diminyak enggau dipiring ka, uдах nya dibiau enggau manok. Manok ke kena miau iya lalu dibunoh awak ka darah iya kena ngenselan piring. Bulu iya selit ka ba bingkai tibang.

Pia mega enggau menyan sama ditunu kena nepok ubat padi baka tandok rusa enggau taring babi sakumbang ka besimpan tu.

Nyadi pasal ba ngintu buah tanah anak lelaki diajar apai enggau aki ngingat ka bagi buah sida sabilik enggau lalu mensiang sida. Nambah ka nya apai seduai aki iya lalu ngajar iya anang enggai nanam buah enggai ka kadudi hari anak uchu nginging buah orang bukai. Ari ajar tu, nya kabuah bansa Iban deka bendar betanam buah, lalu ka pesaka bansa sida.

Nyadi ba chara siru diau anak lelaki diajar siru ngintu gari, ngintu ngepan enggau siru ngadu ka ruai tikai. Nyadi gaya gari patut kena iya, enti gawai mit kurang agi ga pemanah gari kena, enti gawai besai manah agi. Bakanya ga ngintu ngepan, iya enda tau enda siru laban ngepan tu pesaka besai anak lelaki.

Kenyau ari iya belaboh mindah kulu kili, apai indai sama ngelalau anak lelaki jimat cheremat megai belanja. Kabuah alai enda tau enda jimat laban belanja ukai utai mudah ulih. Nyadi enti iya rua, iya deka pulai nadai, lebih agi tau ngaga penusah ka iya leboh iya nyau tuai ila, enti utai lebih kena nadai disimpan iya ari iya biak.

Nyadi enti anak lelaki pegi wang ka ulih iya terubah pegi nya patut kena iya ngaga tanda diri udah mindah. Enti utai manah bisi kena pansa tauka dipeda sarantu jalai, utai nya tau dibeli ka pesaka reta ditaroh anak uchu, kena ngingat ka pengawa kitai ti terubah mindah.

Apai indai enggau aki ini endang adat sida ngajar anak uchu diri diau jimat cheremat. Ari penyimat diau mensia deka bulih selamat enggau pengalantang. Nyadi enti orang nya rua, nadai pikir, bebuai ka utai enda enggau patut, pengawa nya tau mapa ka bilik iya, lebih agi enti apai indai iya udah parai.

Nya alai laban bansa Iban ingat ka lalau jako tuai pasal ba jimat cheremat, nya kabuah Iban ke berakal diau enggai bendar

bejudi, enggai bendar ngabis ka ati diri ba masang manok enggau betui leboh nyabong. Sida nemu penyai ulih tegal ari kelalu lebih ari patut ngereja utai ti tau mapa ka ruang bilik enggau ngaga penusah besai ka anak sida empu ti deka nampong ruang bilik udah sida apai indai parai.

Tang ba Iban ti megai adat tuai main nyabong tu enda nganu sida. Sida nyabong manok, ukai ngasoh manok nyabong sida. Leboh nyabong sida berandau ka utai ti manah enggau nganggap maioh macham pengawa ti manah tau dikereja leboh sida betemu maia nyabong. Ari randau tu nya baru sida bela ngingat ka anggap diri ti deka ngereja pengawa ti deka ngemansang ka umai, kebun, dagang, besekula ka anak, enggau ngereja pengawa ti ngasoh pemi sisi nambah.

Nitih ka pengarap Iban main nyabong manok tu ngayu ka pamarani ati anak lelaki ba maia ngayau mulau ngelaban munsoh. Nyadi manok ka di sabong sida tu dikebal baka ka ngebal mensia suman bendar baka antu ti nyabong kitai mensia. Pia mega mensia ba mata antu bisi maioh macham bulu baka bulu manok.

PENYIRU ANAK INDU

NYADI ANAK indu diajar siru diau belaboh ari anak nya angkat dara.

Utai ti dulu bendar diajar indai seduai ini ngagai iya anang enda nemu, anang enda siru enggau igi asi, padi beras enggau samoa macham pemakai ti datai ari asi. Kabuah alai iya enda tau enda siru ba utai tu, enggai ka samangat utai nya kena kachau antu rua.

Lepas ari nya indai seduai ini ngajar iya jimat enggau kain baju. Enti iya gawa gari kena gawa ga kena iya. Enti diau

dirumah gari kena diau ga utai kena, lalu enti ngabang, gari ke manah agi ga utai kena. Kabuah ngajar iya ngintu gari, laban gari enda tau serama ka kena kitai gawa, diau, mindah kulu kili enggau ngabang gawai orang. Tang utai ti lebih agi ari nya, anak dara enggau anak bujang enda tau enda enggau sanaka ulih sida meresi diri, baik ka ba tuboh skalika ba gari.

Pia mega enti temuai ke sama indu datai, iya diajar siru ka temuai ngasoh tama ngambi ka sida meda bilik iya. Bakanya mega basa jako iya enda tau enda tau jimat enda tau enda siru bejako enggau diri ti sama indu.

Nambah ka nya iya diajar indai seduai ini siru enggau pesaka reta, baka ngeminyak enggau meresi tajau enti enda ulih suah sakali dalam sabulan. Kabuah alai ngereja pengawa tu laban masa Anda Mara seduai Simpulang Gana ti pun samoa pemisi. Enti kitai siru, tau masa Petara, iya tau nambah ka reta enggau pemisi kitai enggau mudah.

Bakanya mega enggau bilik, anak indu endang diajar bendar nemu meresi bilik. Samoa apok, uras enggau utai kamah deka dibuai iya enggau jampat, enti iya bisi meda utai nya.

Bakanya mega enggau chapak mangkok, anak indu enda tau enda siru ngintu sida. Enti temuai bisi makai ba bilik sida, tikai ka manah enda tau enda dianchau iya, enggai ka temuai keji meda lubang, tauka uras, sakalika utai basah ba tikai lama. Enti anak indu kurang jaga ba utai tu, bilik nya tau bulih bantah ari kurang jaga iya.

Nyadi pasal penyiru enggau utai diumai anak indu endang sama megai penyiru sabaka enggau anak lelaki. Tang ba pasal nemu utai kurang sakalika nadai dibilik, anak indu nemu agi, ti tau madah ngagai anak lelaki, awak ka iya beguai meli, ngambi, tauka ngiga utai nya.

Nyadi anak indu enda berapa ngena enggau orang begelumu nyabong. Kabuah iya enda manah, laban nya ukai pengawa indu, taja ga nya enda salah dipeda, enti sida bisi pengawa bukai dikereja dimenalan.

Nyadi pasal ba siru belajar ka utai, sabaka enggau anak lelaki ke patut nemu main tuai diri baka mengap, besugi, bere-nong, nimang jalong, bekana, nimang kenyalang, indu mega patut belajar ka leka sabak, berua, nyangkah, enggau main bukai ti endang main pesaka anak indu. Nyadi enti utai tu dibuai anak Iban baik ka lelaki tauka indu, nya utai ka benama nelanjai ka bansa, ti ngasoh bansa Iban nadai agi pesaka lama.

Tang kamaiatu udu agi Iban besekula, nemu agi sida ila sayau ka pesaka asal sida ti enda ulih ambi sida pulai agi enti iya udah nyau. Nya alai tekala utai tu diatu agi ditemu rebak ti diatu, indu lelaki Iban patut belajar ka main diri enggau naka ulih.

BEBINI BELAKI

NYADI JALAI Iban ngator anak diri bebini nya nitih ka pemisi tuboh ba bilik sida. Enti tuboh bisi laun agi anak lelaki diator bebini, lalu enti tuboh suntok tumu agi ga iya diator.

Kenyau ari kalia alan umur alai apai indai ngator anak lelaki bebini nya leboh umur anak sida manggai duapuluh dua ngagai duapuluh tiga taun. Kabuah alai ba umur maia nya anak iya nyau patut diator, laban leboh maia nya iya pen nyau udah ga bisi akal dikena ngidup ka diri.

Nyadi jalai Iban ngator anak diri bebini baka tu. Indu digiga apai indai ka bini anak sida nya indu ti sempil agi ngagai sida, enti tuboh bisi senentang anak iya dia iya ngiga indu baru patunggal diri menyadi. Enti nadai senentang ba nya sida ngiga

anak patunggal kadua kali enggau ti katiga kali, nitih ka pemisi tuboh kaban sida leboh nya.

Nyadi enti indu udah bisi diati sida, sida lalu bebunga ka jako ngagai apai indai indu. Enti jako nya munyi ti tau ditampong, kena dinga sida, sida lalu betuboh siko dua lelaki enggau indu, mansang ngagai rumah indu nya ke dikumbai nanya bini. Leboh nanya bini tu, dia apai indai lekaki enggau indu belator ka adat kena nikah, enti jako betanya nya tentu udah diterima ari sapiak indu. Tembu jako nya apai indai lelaki lalu ninggal ka lampit tauka pedang kena iya nanggam jako sida. Pia mega maia hari melah pinang pen lalu diputus ka sida leboh tu.

Udah apai indai lelaki nya pulai nanya bini, dua tiga lemai udah nya seduai iya lalu beranchau tikai ba ruai sida, ngempuru ka sida sarumah alai madah ka jako sida ti nanya bini ka anak sida udah diterima apai indai indu. Ba gempuru tu mega seduai lalu madah ngagai sida sarumah pasal ati diri ti nyau deka menjadi pengawa melah pinang.

Udah runding seduai nya dipadah ka ngagai diri sarumah, seduai lalu nyendia ka belanja enggau begaga ka samoa macham utai ti patut dikeluarkan ka ari sapiak lelaki.

Nyadi ari sapiak apai indai indu udah sida sarumah baum, sida lalu merengka utai kena menjadi gawai melah pinang. Utai disedia ka sida nya begaga ka tuak, betutok tepong ka penganan enggau begaga ka jelu ka lauk baka kerebau, chapit tauka babi.

Nyau kira empat lima hari pengawa melah pinang nyau deka nyadi, endor apai indai indu ngempuru ka sida sarumah baru alai nanya ka samoa utai udah sedia samoa. Enti orang bela ngumbai diri udah sedia samoa, sida lalu belator ka buah rumah ti kena ambi. Udah jako tu segala, nya baru orang dua iko diator ngambi ngabang, siko kulu enggau siko kili. Utai di bai

seduai tu ngambi ngabang temuku tali, siti temuku ka sabuah rumah. Temuku tu diasoh seduai buka orang ti empu rumah, siti temuku dibuka sahari. Sereta abis temuku dibuka, nya meh hari orang ngabang ngagai rumah sida, babis-abis enggau indai enggau anak, enggau tuai enggau biak. Orang ke enda dapat bejalai diasoh bejalai enggau tungkat.

Nyadi maia hari melah pinang nya apai indai lelaki datai enggau perau dikajang enggau pua kumbu enti sida merau. Nyadi enti sida iya orang diau di menoa atas sida datai bedarat.

Enti merau orang ka dara ari rumah apai lelaki ngadu ka diri bendar ngena pekayan Iban, berawai, betumpa, benyawir, besugu tinggi enggau beselampai. Orang ke bujang pen bengepan besirat, besimpai, betengkelai, belanjang, beunus enggau bekain burit. Sakumbang ti merau tadi sida ke lelaki begendang ngelagu penatai diri sereta awak ka enda ninga burong.

Sereta perau sida nuntong di pangkalan indu, orang ari rumah indu lalu merejin sida enggau bedil. Uдах nya sida sangkai, orang ke lelaki enggau indu mandi guai ka begari. Uдах sida tembu mandi nya baru sida begari bakatu:

Lalu pasok ka sida ke indu kain bebuah sigi,
Ngambi empili buah bambang.

Uдах nya pasok ka sida tumpa pirak,
Tak berak-berak baka ke baru ulih matak,
Ari selepak batu arang.

Uдах nya pasok ka sida rawai rinyai,
Melempai dikerigai rusok marang.

Nya baru adu ka sida lampit apit
Enggau sabit ringgit magang.

Nya baru sida ngelepi ka sakali sanggul silai,
Bedujong ka bungai tual satakan;

Taja kepai-kepai baka penerebai burong rindang.

Udah nya baru sida ngadu ka sugu tinggi,
Baka engkerejak tiang empang.
Udah nya baru sida ngelempai ka selampai kain besai,
Baka api makai nyerarai ujong petebang.

Udah nya baru sida ke tuai enggau lelaki ke bujang belaboh begari:

Belit ka sida lampit sirat kesumba,
Udah nya adu ka sida sengkelai simpai manah baka.
Nya baru sida nyuli ka sakali labong Surabaya,
Ujak ka sida bulu kenyali banda,
Lalu ditangkin sida berangin pedang beulu temaga,
Bejabong ka gupong buok mensia,
Indah enda baka pemanah gamal Keling seduai Laja,
Ke baru datai ari menoa raya sida iya
Di Nanga Panggau Dulang.

Udah sida tembu begari orang ke empu pengawa ke bisi nurun ka ai lalu ngasoh tuai sida dudok nanya ka burong sida. Udah jako burong tu tembu adu ka sida, sida pen lalu dibai orang bejalai niki ka rumah.

Leboh tuai sida ke dulu bejalai, ngenulu ke bala nuntong ba kaki tangga dia iya diasoh orang ngayang babi siko ti kena niki ka sida. Leboh iya ngayang babi tu orang ari rumah merejin sida enggu senapang, lalu timbal sida enggau senapang sida empu ari tanah.

Tembu munoh babi ditu sida lalu dibai orang niki tangga. Ba pala tangga digaga ka orang kuta, lalu nya diasoh orang buka sida ngena jako panjai berambai. Tembu muka kuta nya baru sida dibai orang bejalai niti ruai, dia alai sida dilanggar orang ba tiap pintu enggau tuak enggau arak. Rami bendar sida bejalai tu laban bungah sida chukop bendar.

Udah sida nyau bejalai niti rumah bisi kuta siti agi ba tengah rumah asoh orang rumpang sida baka ti ba pala tangga tadi. Udah kuta tu dibuka sida agi bejalai ngapus ka rumah. Ba ujong rumah tu mega kuta siti baru asoh orang rumpang sida baka dua iti ke udah tadi.

Udah kuta ti katiga tu dirumpang ba puting setak, sida lalu mutar bejalai ngagai ruai indu ti dipinta sida. Datai sida dia bala orang ke indu lalu tama ka bilik, orang lelaki dudok ba pantar.

Nyadi siti agi uti ditu, enti bilik indu ke diambi nya diadu ka apai indai iya chukup gaya, dia sida ke datai nya diasoh orang muka pintu bilik nya ke ditambit orang enggau sangkoh lalu ari dalam nyin diredai ka orang pua kumbu. Udah pintu tu dibuka ngena jako berambai agi ga bisi siti da uti, laban ba bilik atas din bisi katil ke udah diadu ka orang kelambu asoh orang silak ka tuai sida. Udah tembu nya baru indu ke datai tadi lalu diasoh orang tama ka bilik.

Nyadi bilik indu nya endang udah dianchau ka sida tikai pachar,

Baka linsar lambar bekuang.

Udah dianchau ka sida tikai rutan,

Ke beranyam map lubang.

Anchau ka sida tikai lingkok,

Anyam Endu teruna dara Lemok,

Neladan lingkok neraja nentang.

Atas tikai endang udah sedia ka orang baku,

Sarang langgu buah pinang.

Baku mau pen bisi liau-liau tampak mandang.

Udah nya dudok ngentam meh bala teruna dara ganggam,

Baka bulan kembong mansang.

Dudok lanji-lanji meh sida teruna dara mereti,

Baka guchi tajau lelayang.

Sida pen lalu berandau nyampau bekenang,
Bebelah ka selabah buah pinang.

Nyadi pengabang lelaki ke di ruai tadi lalu dibela orang ka empu rumah. Terubah jalai orang mela sida nya meri sida ai aus, udah nya sida lalu diberi orang ai untong. Nyadi untong siko siko sida nitih ka penuai enggau gaya pendiau sida diau di menoa. Orang ke tuai rumah bempu ka untong saratus, reti nya bempu sapuloh glass murit laban ai tuak. Nangkan ka nya delapan-puloh, udah nya limapuluh, udah nya diserama ka empatpuluh magang.

Udah tembu ai nya diberi orang nya baru indu enggau lelaki ari rumah nya bejalai bengenpan lalu dilagu enggau gendang niti rumah masu sida ke datai. Uдах tiga kali sida bejalai besundang, niti rumah, datai sida ba pengabang dia sida lalu meri pengabang ngirup baru. Ai nya dikumbai ai basu.

Nyadi ator enggau pengabang bukai pen bakanya magang ga jalai sida masa sida. Uдах tembu nyambut pengabang, nya baru orang bebatak ka bala pengabang ka setak ka setak beirup ka ai.

Nyadi enti pengawa tu pulai hari, tengah hari pengabang lalu diberi meraru. Tembu merarau kira pukol dua ngirup kupi. Sereta lepas ngirup kupi, nya baru orang belator bejako ka pengawa melah pinang. Nyadi enti pengawa bemalam lain agi ga ator, laban maia bejako ka pengawa diator udah lepas tengah malam. Lalu bepakai ka utai pen suah ga agi ari ti nikah pulai hari.

Nyadi orang ti diator bejako ka pengawa pen bakatu. Orang ti datai nya diator orang dudok ngalih ari pantar, lalu orang ti bejako ngari ka indu nunga sida. Uдах samoa orang datai magang dia, nya baru orang ka empu rumah ke diasoh nanya ka berita diberi orang dalam rumah nya ai ngena jako tu:

“Tu ai teratak bintang banyak,
Ninggang awak arus nanga.
Ai gemuroh bintang laboh,
Baka suloh api kelita.
Ai kechapah batu belah,
Panjah darah babi menoa.
Diturun ka kami nyerumba sebun ambun nyaia,
Dipelam kami enam malam,
Dalam Palawan tajau menaga.
Dia iya dipeda bebali mansau jera,
Ngenjing perabansang dalam balang butol segala.
Nya alai ka lemai tu,
Merenchit meh tu mimit,
Ari burit chawan bunga,
Ninggang kelasah tikai bepuncha,
Laban iya dikenai kitai begulu,
Bejako nanya ka berita.
Iya ga dikenai aku ngansah petatah
Dabong saleka enggi nuan aya/unggal,
Ngambi ka iya nekis nyaris inggar didinga,
Disema ka aku munyi ketebong kulit baya,
Ke teleba kena mesan ka Ini Andan,
Kena nyapa Raja Sempulang Gana,
Ngeraga bunga takang engkenyang.
Tang deh tu ngambi ka nuan aya/unggal,
Tau bejako nanya ka berita,
Nyengala leka terang dinga pengabang.”

Udah tembu jako nya, ai pen udah ga dirup orang ke diasoh
nanya ka berita nya tadi, iya lalu angkat bejako besabar munyi
tu:

“Kesal meh aku tu di dabal tangkai chantong,
Laban aku tu udah diberi kita ai sempuli padi nibong.
Di iri ka kita dalam mangkok jalong jebong,

Iya ke udah digela anak Bujang Lemambang Luong,
 Ko iya ke meri ngagai aku.
 Digela iya ai semilu batu anggong,
 Ulih iya ngambi dipeketi panchor wong.
 Ulih iya nyagam dikerangan pala lepong,
 Leboh iya ke jeritan ketupong,
 Bujang Sabenang mali lebu.
 Ko iya kena iya ngansah petatah ujong dabong,
 Enggi aku, ngambi ka rarengong nanya ka berita dimoa
 pengabang.
 Tang deh tu nyau ngasoh ati aku berasai nangi,
 Meda bala kita ke bejumpa maioh betugong,
 Ngasoh lempuang aku nyau mansang petang,
 Meda pengabang ka betekang maioh begenturong.
 Kada enda asai tu pengesal ati niang Rentap apai Tambong
 menya,
 Leboh iya ke nanam chagak bedil kelutong,
 Dituchong Sadok rarenjong, digelar Bujang Timbang
 Berang."

Uдах tembu iya besabar munyi nya, nya baru iya bejako
 nanya ka berita ari orang ke datai munyi tu:

"Nya alai tak sangkal, tak sabal meh aku bejako,
 Didinga kita. Nya alai aku munyi nya:
 Aku ga meda kita ka landai indu landak,
 Ke bebulu burak betegelang labang,
 Putting juring ngujong geraji.
 Aku ga tepeda ka kita ke tajai indu tajam,
 Belanggai panjai bekengkang punggang,
 Ke taja kepai-kepai ngambu diri terebai ka Brunai pulai hari.
 Aku ga meda kita ke beruang indu raak,
 Ke ganggam lengan ngerumpang batang tebalian wi.
 Nya alai lama kitai tu udah berimbai dudok besendi,

Aku nyau ka nanya ka sapa kita tu, ke kenyalang indu
kenyali?

Laban aku nyau ngasoh iya ngelua ka sapi buah belili,

Lak ka bisi diambi endu teruna dara tinggi,

Lak ka bebali nyadi taring uting ngeli jani,

Ka ubat sempeli,

Kena kami ngisi igi tibang rentam.

Ni bagi kita ke dikumbai kami kenyalang kenyali lelaki?

Laban aku nyau deka ngasoh iya ngelua ka buah engkilili
hari,

Ditikai anyam diri,

Lak ka iya bebali nyadi ngeli jani babi lelaki,

Ka diambi sida endu teruna dara mereti ka ubat padi,

Lak ka tebekan lalu jadian.

Nya alai lama kitai tu udah betapak dudok samuka,

Aku nyau ka nanya ka bagi kita ke dikumbai

Aku kenyalang kenyali banda?

Aku ga ngasoh iya ngelua ka sapi buah

Kembayau jera, ditikai anyam dua,

Laban lagi iya tau bebali nyadi ngeli

Jani babi menoa,

Lak ka diambi sida lengayun endun dara,

Ka ubat padi puya,

Kena tinda ngisi moa tibang tundan."

Udah abis jako orang ti nanya ka berita, alai orang ke dipadu
ka meri ngirup, meri ai ansah baru ngena jako timang munyi tu
ngagai temuai ke diasoh nyaut nusoi pejalai sida ke datai:

"Tu ai buah padi mudah,

Baka tangkai jelai merundai.

Nya alai ai tu ai ansah,

Ukai baka ke ngansah beliong

Bisi peredah,

Ngansah rantong besi patah.
Ai sempuli padi mudah tu,
Disua ka aku enggau tapa
Tunjok tengah,
Kena aku nyiram geman dabong
Tatah enggi nuan aya/unggal,
Kena aku ngasoh nuan bejako
Ngena entelah,
Laban nuan endang diasoh orang
Nampong bungah jako tuai.”

Ai ansah nya lalu dirup temuai ke diasoh nyaut jako orang
ti nanya ka pejalai penemuai sida kia. Uдах iya ngirup ai nya,
iya pen lalu bejako ngena sabar dulu munyi tu:

“Nyau kesal mimit meh ati aku ke
Uдах ngirup ai sempuli pulut bukit,
Ke disimpan kita dalam chawan indu chubit,
Ke disua ka anak bujang lemambang entelit langit,
Ngena tapa jari singit.
Ko iya ke nyua ngagai aku,
Ngasoh aku gaga beati gagit;
Tang deh tu nyau ngasoh pekira
Aku nyaya mansang mit;
Kada enda asai tu pengesal ati
Niang Aji menya,
Leboh uman iya ke nan di Kerangan
Sungai Langit.
Ko iya ngaga kuta kepit lambar temiang,
Tang deh tekinsit mimit,
Nyadi kemibit daun lalang.”

Uдах tembu iya besabar ka jako diri, nya baru iya bejako
nusoi berita munyi tu:

“Nya alai tu aya/unggal,

Kami tu meh ke dikumbai orang anak tengas,
 Ke jelas-jelas mudik ka Batang Ulu Ketungau,
 Ke bagas ngempas ngaban dikerangan Sandau
 Miang,
 Napat ka riap moa bubu.
 Kami tu meh ka dikumbai orang anak baya,
 Ke bejalai kaya-kaya,
 Mudik ka Batang Ulu Salimbau,
 Ke benyawa nukang ka raang,
 Mesai silak moa pintu.
 Kami tu meh ke digelar orang anak kenyalang,
 Ke masai ngenggang di Batang Ulu Julau,
 Deka napat ka kembayau mansau ngabu.
 Wuok empeliau arang meh kami tu aya/unggal,
 Ke masai berua dirandau kubal tusu.
 Nya alai kami ke datai ditu bisi penemuai,
 Bisi pejalai meh kami tu.
 Kami tu dibai apai *anu* seduai indai *anu* tu nginsit ka pintu
 langit rapat,
 Baka tambit tekura umang.
 Nyau ka ngansat ka pintu langit entap meh kami tu,
 Baka singkap kerang kepayang.
 Nya alai nya enti nya amat kesoh bunga kerakap,
 Ke balat bali-ali,
 Enti nya amat aba bau bunga,
 Ke ngaba besahari sahari,
 Nya meh kabuah kami ke kitu.
 Dibai belayan kaban indu,
 Negu selulu bintang buyu,
 Mesai jalu jalong jebong.
 Kami tu datai dibai sida ke dara,
 Ngemata ka bintang saleka,
 Mesai buah kepayang gadong.

Dibai sida ke biak nyubak bintang banyak,
 Tumbuh dikeboh langit landong.
 Nya alai kami tu nampong aba bau bunga,
 Ke ngaba sapiak bulan,
 Kami tu deka ngabas rengut bunga buot,
 Dipuput ka ribut angin selatan.
 Nya alai kami tu ka nyua ka tapa jari kanan,
 Ditampong tangga sukan,
 Jalai Renggan menya ngulih ka beriran bintang bekinsit.
 Nyua ka tapa dada jari meh kami tu,
 Ditampong tangga Beji,
 Jalai Beji menya ngebus ka kunchi pintu langit.
 Ni enda pia ko aku:
 Kami tu ga ka mindah ka genturan papan panggah,
 Nya ga penudok perampang bunga burah,
 Ke berendah mansau jera,
 Ke berendah mansau tisi.
 Kami tu ga dibai orang negu duran papan timpu,
 Penudok perampang bunga kapu,
 Beukir sudu ular bisa ke besudu ular lidi.
 Kami tu deka nanggong genturan papan gendong,
 Digembar enggau perampang bunga balong,
 Ke begantong nengan menoa,
 Ke begantong nengan hari.
 Nya meh pejalai, nya meh penemuai kami tu,
 Enggau kalu enggau indu,
 Enggau anak enggau anembiak.
 Dekanentu ka enti utai nya amat,
 Kami ka ninga,
 Enti utai nya tentu kami dekanemu."

Udah abis saut orang ke nusoi pejalai sida kia ka, nya baru
 siko orang ke meri ai nyua ka ai ngena timang munyi tu ngagai

orang ke diasoh bejako ari indu nyaut jako nya tadi:

Tu ai serabat pakau kawat
Baka jelap daun api,
Tu ai buah limau tapah,
Ke terubah jadi brandi.
Ukai enda tu diturun ka kami,
Nyerumba sebun ambun pagi,
Dipelam kami enam malam,
Dalam Palawan benda guchi.
Iya ke ditaroh kami mua penegoh,
Dalam mandoh benda tali.
Dia iya dipeda kami bebalı mansau ngeledi,
Ke nyeligi tama segi indu balang.
Nya alai ka lemai tu aya/unggal,
Merenchit meh tu mimit ari burit benda guchi,
Ngeluah dikelasah tikai peradani,
Dikena aku ngansah terinting dabong gigi enggi nuan,
Ngambi ka nekis nyaris inggar bemunyi.
Nya alai menya udah ga tu dikena aku,
Ngansah anak perapang pedang temagi,
Enggi Antau Linggang Nengeri seduai Gun Mangku Bumi
Enggau enggi Nanang seduai Aji,
Ke dikena sida bepantap nyenggai hari,
Ngalah ka segi kuta besimbang.
Ukai enda pemulai nya sida iya gaga ria rindu ati,
Begawai ka gigi balang berang.
Nya alai tu ai binka lia kerap,
Ai pun tarum kemuja enggi aku aya/unggal,
Dikeluah ka aku dikelasah tikai anyam dua,
Ke udah diembun sida teruna endu endun,
Sataun mangun pun padi puya.
Udah dipanjah endu teruna dara bungah,
Enggau darah babi sepa.

Udah nya ditaroh kami tegoh-teguh,
 Dalam mandoh indu benda.
 Tang deh ka lemai tu,
 Merenchit mimit ari burit moa kacha,
 Kena aku ngansah petatah dabong saleka,
 Enggi nuan aya/unggal.
 Nyadi menya udah ga tu dikena aku ngansah,
 Anak perapang pedang temaga,
 Enggi Garran seduai Mula,
 Enggi Ngumbang apai Lada,
 Enggau enggi Bantin apai Rengga.
 Leboh nya bisa ko iya ari sia bemata changka,
 Laban iya lalu diuji ka sida Bujang Mereti,
 Kena sida ngalah ka segi kuta Raja,
 Di nanga arong Skrang.
 Tang ka lemai tu aya/unggal,
 Kena aku ngansah anak terinting puting dabong saleka enggi
 nuan,
 Ngambi ka iya nekis nyaris inggar didinga,
 Ke disema ka aku ngagai terais panjong kapal Johara,
 Leboh iya ke ngundan Ranee bini Raja,
 Mudik ka menoa Batang Simanggang.
 Agi ga aku nyema ka nyawa nuan nekis nyaris, munyi
 terais nyawa radio,
 Ke dikena Koh apai Segura,
 Madah ka menoa belaboh mansang.
 Tang enti nuan udah ngirup ai tu aya/unggal,
 Iya ukai ngasoh nuan lesi bebadi ilang laya,
 Laban iya semina ngasoh nuan ragak inggar nyawa,
 Nanya ka berita nyengenda leka didinga samoa bala
 pengabang.

Udah ai ansah nya dirup iya ka diasoh bejako, iya lalu
 bejako munyi tu:

Nya alai nyerumba engkeleman bulan peranama tu kamari,
 Leboh aku tindok di retok papan pengala,
 Leboh aku gali dilinti tikai bepuncha,
 Bebungkor enggau selanggor bali mensuga.
 Dia deh aku bisi mimpi.
 Bemimpi asai ka dijuong Tutong seduai Laja,
 Ke datai ari menoa sida iya di Nanga Panggau Dulang.
 Dia aku bemimpi dibai seduai nyimpong gupong rajang
 Begantong ke diuan tedong indu naga,
 Asai ke dibai seduai nyubak bintang banyak,
 Mesai chapak pinggai kemuja,
 Ke lalu laboh ka baroh ninggang tandoh tajau menaga,
 Ke begamal remba-remba,
 Dipeda baka anak Dayak, bemata baka anak China,
 Ke tau diasoh kami megai menoa,
 Ngator uta wang timbang.
 Nya alai meda nya nyelai bakanya,
 Tak begau deh kami di-sakayu antu rumah raya,
 Ka begeri tajau menaga.
 Nya alai iya lalu dibiau kami enggau selanjau manok banda,
 Dipamping kami enggau piring chukop perengka,
 Laban nya nyau asai kami ka nginta ka anak petara,
 Nginang bala pengabang.
 Nya alai nyerumba linda sabong lemai,
 Nengali buli bulan mingkai tu kamari,
 Leboh aku tindok diretok papan pengalai,
 Gali dilinti lambar tikai,
 Bebungkor enggau selanggor bali begajai,
 Dia deh aku bisi mimpi, asai ke dijuong Sanggul Labong
 seduai Nawang Gundai,
 Ke datai ari menoa raya sida iya,
 Di Nanga Gelong Merundai,
 Ke bekabuchai baka jila tangkai isang.

Dia deh aku asai ka dijuong seduai,
 Nyimpong tangkai ranyai begajai,
 Ke bekabuchai merundai nurun batang.
 Asai ke dibai seduai negu bintang buyu aku,
 Laboh mesai jalu jalong timang,
 Laboh iya ka baroh ninggang tandoh tajau lelayang.
 Dia asai ke lalu begau deh kami sakayu antu rumah panjai,
 Gaga ka anak tekang gempang mau urai,
 Asai ka bisi dipeda gali, asai ka tau nganchau tikai,
 Nginta ka penatai temuai mela pengabang.
 Nya alai rindu deh kami sakayu antu rumah lelempai tu
 meda nya,
 Nya alai lalu dibiau kami enggau selanjau manok tawai.
 Lalu diadu ka kami pamping piring rendai,
 Asai kami ke nginta ka penatai Raja Besai,
 Ke datai ari menoa raya iya ditasik besai ledong linang.
 Nya alai utai ke dipinta kita nya amat aya/unggal.
 Laban leboh bulan *anu*, hari *anu* tu kamari,
Sanu seduai *sanu* bisi datai ba kami ditu.
 Tang deh leboh nya utai tak bedau repa agi siga.
 Nya kabuah jako kami madah ka diri agi deka bejinak, agi
 mai *seduai* bansak-ansak.
 Tang udah nya deh danti kami datai,
 Nadai ga kita datai ngundang iya baru kitu.
 Nya alai ka diatu tekang gempang mau segala kami nya
 nyau nadai agi ditu,
 Iya udah ditaroh kami tegoh dalam mandoh benda ningka,
 Udah dipagar kami enggau salumbar besi baja,
 Diseleti kami enggau badi bemata changka,
 Dikunchi kami dalam peti beranggong dua,
 Dikat kami enggau kawat panjai tiga.
 Ka diambi kami enda ulih ambi agi,
 Ka ditiki enda ga ulih tiki,

Laban iya nyau beduri ka badi besi kemuja.
 Ka ditebang kami enda ga ulih tebang,
 Laban batang iya nyau bepuak ka belembang lampang baja.
 Ka ditunu kami enda ga ulih,
 Laban ai bisi engkeching mesai buah kendi temaga.
 Pun iya nyau dintu pasun ular naga,
 Batang iya disengkilong tedong indu kacha.
 Dan pintu iya diuan madu manyi banda,
 Puchok iya enda agi ulih rurok enggau tirok mata sampida,
 Laban iya diuan tunggok,
 Ngemata ka rayok bulan peranama,
 Ke taja kela-kela maia peranama rerak rumpang.

Udah abis jako nya alai orang sapiak ari lelaki lalu ngasoh
 siko ga ari sida bejako baru nyaut jako ari indu ti baru udah abis
 tadi. Udah iya diberi orang ngirup, iya lalu bejako munyi tu:

“Nya alai amat munyi ko nuan nya tadi meh aya/unggal,”
 ko iya, “laban kami ke datai tu pen nemu ga utai nya
 udah ditaroh kita tegoh. Tang ngasoh ati kami enda
 rawan, laban kami endang bisi sedia:

Enti tipang belalang ular enseluai,
 Kami endang bisi mai,
 Iya ke ulih niang Minggat apai Runai menya,
 Leboh iya ke pegi ka Kerinchi Pantai Panai,
 Leboh iya ke bengat beberita besai,
 Ke lalu parai diseberai tiban Nanga San.
 Tipang belalang ular naga,
 Kami endang bisi sedia,
 Iya ke ulih niang Rekaya Dana menya,
 Leboh iya ke nyerang numbang ka
 Batang Sungai Raya,
 Lalu mapa ka China Batang Singkawang.
 Tipang belalang ular engkerudu,

Bisi ga kami tu mai,
Ulih niang Linggir Mali Lebu menya,
Leboh iya ke mupu anak iru,
Ka ulu Sugai langkang.
Enti tipang belalang ular tedong,
Kami endang bisi mai,
Nya ga ulih niang Tarang apai Dungkong menya,
Leboh iya ke ngepong ka barong,
Nanga Rajang.
Tang ka tu deh kami enda ngena tipang nya agi,
Laban iya udah kelalu lama.
Tang deh sakumbang randang bulan kembong tu,
Sakumbang kitai ke udah digerah Sultan Tuan Insong,
Betanam ka getah nyatu rambong,
Dia deh kami bisi bulih pengaruh baru,
Iya ke bisa ari raka taring tedong.
Enti kami nikau ka iya tau mengkanjong,
Enti iya bejadi tau nyurong.
Enti kami ngena tipang tu aya/unggal,
Tak enda iboh kami tempalng ka,
Semina kami udah ayan serungkong,
Pintu lawang kita lalu tetukang.”

Udah tembu jako nya, nya baru orang ke bejako ari indu enggau lelaki ngasoh siko orang ti tau betusut nusut penyauh enggau penyemak lelaki enggau indu ti deka dipejadi nya ngambi ka orang maioh nemu, lalu nyamai alai sida bejako ka adat enti sida bisi ngudi menoa.

Nyadi apin tukang tusut nyebut leka tusut iya, iya dulu diberi orang ngirup ai tuak tauka arak ngena ansah tu:

“Tu ai pelepah apong nipah,
Tumboh ditanah pala pantai.
Tu ai batang bindang beduyah

Ditanam Saripah Dayang Mai.
Tu ai dan neranja bulan,
Tepan kaban burong tunggok,
Sikok-sikok nyabak ka rayok bulan peranama.
Sida ke tuai pen sama udah berintai besarok dudok,
Nya alai nuan digela aku ngagai bidok linggar kepar-kepar
Ngelayang dilansar pala lubok;
Enti sakumbang menoa kitai,
Ti kena tinggang menira
Raja Brooke,
Nadai ga aku ninga nuan serabana balat suntok;
Enti temuai datai nadai ga aku ninga nuan kala enggai
Nganchau tikai ngumbai dudok;
Laban nuan ke endang sidi dijari ujung tunjok;
Teleba megai pasok maras tulok moa pasu.
Tu ai menyalin ke bermain burit mangkok,
Ai ginga ke penyaga mata enggai tindok,
Ai ginga nyamai tu ngasoh nuan gerai dani mabok.
Disua ka aku ngena tapa kiba ujung tunjok,
Disambut nuan enggau mulut dabong rasok;
Aku ga ngasoh nuan muka randau kara;
Ngusai ka randau rambai,
Nyira randau buok;
Ke berasok betampong saribu.

Udah orang ti diasoh betusut ngirup ai ansah tu, iya lalu belaboh megai daun apong kena iya ngerintai tusut iya. Nyadi tusut dulu iya datai ari Sengalang Burong, laban ari nya iya ulih nusoi adat melah pinang ti bepun ari anak Sengalang Burong ke benama Aji ke berani ngilah bulan, Suka Raja Rengayan ti jadi enggau Endu Anggu Kaul Ketapu, Endu Kuku Anyam Saribu anak Raja Sempulang Gana seduai Endu Endun Serentum Tanah Tumbuh garas-garas tampak panas tengah menoa, Endu

Iyak Cherindak Tanggui Buloh kayak kindang terebang didandang danggur uma. Ari nya mega iya lalu nusoi terubah Raja Sempulang Gana ke minta derian ngagai Sengalang Burong, manok siko mesai pipit ke betada ngelong ka patong, babi siko mesai chit ke betaring ngelong ka munong enggau benda mandoh chelum sigi sereta enggau satawak salebuan.

Nambah ka nya iya mega lalu nusoi adat orang jadi mali ngudi menoa nitih ka ajar Sengalang Burong ngagai uchu iya Sera Gunting leboh iya jadi tauka beleman enggau ibu menyadi indai iya ti benama Endu Dara Chempaka Tempurong Alang ke digelar Dayang Patri Langit. Uдах iya nyara samoa adat nya, nya baru iya nurun ka tusut iya ka baroh sereta lalu nusoi derian aki ini ke kelia ti besai laban ari raja enggau berani. Nyau datai ba tuboh orang ke ditikah nya baru iya madah ka penyauh seduai udah bekejang udah tetukang ari pangan. Uдах jako iya laboh ngagai tu, nya baru orang ngadu ka adat ti seduai nya bisi jadi salah serak. Enti seduai jadi serak satu enggau dua di itong ari tuboh apai indai seduai, seduai disapat ka ai, dibunoh ka babi dua, siko kena ngenselan ai, lalu siko kena ngenselan menoa. Seduai lalu mandi darah babi. Babi kedibunoh nya enda tau enda babi sepa*, lalu benda keluar ari lelaki semilan igi jabir enggau ari indu tujoh igi jabir. Nyadi enti seduai iya jadi sapiak dua sapiak tiga adat seduai agi disapat di ai, babi sepa bunoh bedau dua tang adat benda mit agi. Nyadi enti seduai iya jadi serak tiga enggau serak empat nya baru seduai bekalih didarat dibunoh ka babi siko kena ngenselan menoa. Enti seduai jadi serak empat enggau serak lima seduai semina diasoh betebang buah ari sapiak. Enti jadi serak lima enggau enam seduai semina agi diasoh ngetup kering samengat. Lalu enti jadi serak enam enggau tujoh naka agi beketup garam kena nyaga tuboh enggau samengat diri.

* Adat bukai tau dibacha pemacha ba jerita Sengalang Burong.

Udah tembu orang bejako ka adat nya, nya baru apai indai indu minta derian enggau adat bukai ari apai indai lelaki kurang lebih baka tu:

- (a) Enti derian \$ 25. — bunga pinang \$1. sigi jabir.
- (b) Enti derian \$ 50. — bunga pinang \$2. sigi panding.
- (c) Enti derian \$ 75. — bunga pinang \$4. sigi alas muda.
- (d) Enti derian \$100. — bunga pinang \$5. sigi alas ngerang.

Nambah ka nya ari sapiak indu agi minta penukop tangga beliong sabilah, pemuka pintu sangkoh sapuchok, simbak kelambu pedang sabilah, sapu uras enggau adat redak bukai.

Apai indai lelaki lalu ngeluar ka samoa utai tu, tang deh iya mega minta adat ari apai indai indu. Adat dipinta iya nya, pemasu kaki tepayan sigi, penyandih bendai selabuan, tulak luan sumpit sabatang, kajang perau pua kumbu salambar enggau adat redak bukai nitih ke pemaioh utai dipinta ari sapiak indu tadi. Ba bebayar tu sida nadai rugi nadai untong, laban sedak adat tu semina kena orang bungah tuai sama tuai, lepas ari wang derian enggau bunga pinang tadi.

Udah tembu jako tu, nya baru orang ke tuai bejako baru madah ka enti sema seduai tu bisi muai pangan nadai enggau pasal enggau tegal, enti lelaki muai indu derian iya lalu. Nyadi enti indu muai lelaki derian iya dipulai ka lalu dikaki enggau limapuluh ringgit. Nambah ka nya agi ga tandan jako sida bisi enti barang sapa semina ngabas papan ngabas luan pangan iya kena pinta adat sigi alas, nambah ka adat timbang sarak ti dikeluarkan ka iya.

Udah adat tembu dikejako ka, nya baru orang ke indu mai pinang disandik enggau selok sundang menarang ari bilik ka dibelah diruai. Nyadi indu ti melah pinang dia endang indu

kena pilih ngiga orang ti bidik lansik enggau peridi diau dimenoa. Nyadi penyampau sirap pinang iya nya tiga, lima tauka tujuh sirap. Pemaioh sirap nya digaga nitih ka malam endor seduai melaki bini nya datai kia ka baru nyundang pinang. Enti menoa semak mimit agi ga sirap pinang. Enti menoa jauh maioh agi sirap pinang.

Udah pinang disirap, nya baru lemambang ke bisi dia diasoh orang nindok ka anak. Udah anak nya dikumbai tindok, nya baru iya ngerak enggau leka main gerak anak. Leboh melah pinang diruai tu dia orang rami bendar beirup ka ai tuak enggau bempa ka kupi ruti enggau penganan maioh macham.

Sereta tembu melah pinang tu pengabang maioh lalu didijir ka alai makai pagi. Udah tembu makai nya baru orang nyapat lelaki enggau indu ka ai enti seduai besapat. Nyadi enti seduai iya jadi nadai ngudi menoa, pengawa melah pinang abis tadi udah anak digerak lemambang.

Nyadi enti seduai disapat, udah seduai beradu, orang lalu mai seduai nurun ka ai enggau gendang. Utai kena orang mai seduai nya sirat kira panjai tujuh. Ngenulu ka bala sida ti bejalai nya orang ti diasoh ngayang babi, udah nya ditangkan ka orang ti nyampi, udah nya orang ke minching kebok ka kurong samengat, udah nya indu ti mai piring, udah nya indu enggau lelaki ti disapat enggau orang tuai bukai ti kena pilih enggau ngereja pengawa.

Nyadi lelaki siko ti dipadu ka jadi antu endang dulu udah nurun, lalu iya tu berdiri ari seberai pendai ti endor orang besapat.

Datai bala orang ti besapat di ai, orang ti nyampi pen lalu nyampi, ngangau ka Petara enggau samoa raban antu ai awak ka sida nemu pengawa ti nyapat indu enggau lelaki ti jadi ngudi menoa. Iya mega minta Petara enggau antu ai enda ngasoh

menoa kudi, laban kereja anak mensia ke bisi salah jadi belaki bebini udah diadu ka nitih ka adat ari ajar Sengalang Burong. Uдах iya tembu nyampi tu, nya baru orang ti diasoh munoh babi lalu nyayat babi nya ngena nyabor nyengala. Darah iya lalu rarat ngagai endor lelaki enggau indu ti disapat nya diasoh mandi.

Leboh orang nyayat babi tu, iya ti diasoh jadi antu ari seberai pen lalu ngangau nanya ka pengawa bala maioh ke benong chapoh kiroh diseberai. Ninga tanya iya, siko tuai nyaut ari seberai munyi tu:

“Nyadi kami tu nyapat sanu seduai sanu ti deka jadi belaki bini salah serak. Nya alai kena kami niti nali adat tuai kami tu ngenselan menoa enggai ka hari kudi tanah bebali enggai ka tanah berenyang ai belinggang. Nambah ka darah babi ke udah dibunuh kami, kami agi nasih ai ngena utai tu:

Sumpit tapang kena ngerejang lubang kilat,
Kain beragi kena miau moahari sarat bebuat,
Kumbu rayong kena nyerayong tekuyong dalam unkap,
Pedang panjang kena ngerandang remang rarat,
Beliong lajong kena mungga urat lensat,
Pinggai besai ke alai kaki betakat,
Rangki siti kena nasih ai ngambi ka enda beriap,
Panti besi ka alai kaki betakat,
Tepayan alai nyimpan samengat.

Tembu nya iya ti munoh babi tadi munoh babi siko baru kena ngenselan menoa. Darah babi tu di tumbak ka lalu keda dianjong orang ka umai enggai ka taun kudi. Lepas nya pengawa besapat pen tembu.

Uдах orang pulai ka rumah indu enggau laki iya pen lalu begari ngadu ka diri deka pulai ngagai rumah lelaki. Tembu seduai begari pengabang maioh pulai, lalu sida ti ngambi bini pen

pulai mega ngena perau sida empu mai bini nya pulai. Leboh sida merau tu baka sida ti mansang, sida begendang ngerami diri sarantau-rantau ai alah nyentok ngagai rumah sida empu.

Datai dirumah, indu lalu di ulu sida ti dara niki ka rumah lalu tama bilik laki iya ti endang udah dianchau ka orang naka pemanah tikai enggau lagu bukai ngena pua nitih ka pengeraja sida.

Udah tembu makai lemai nya, alai apai indai lelaki nya ngempuru ka samoa sida sarumah ngagai bilik iya, awak ka ngulu sida ti bebiau. Sereta orang mairoh datai, seduai ti baru jadi nya lalu dudok ba satawak besendi dua lebulan. Nyadi orang semak indu, siko ga indu dara, lalu dudok semak lelaki siko ga bujang.

Udah sedia magang sida alai orang tuai siko tauka lemambang enti bisi, lalu angkat megai manok miau sida. Leka biau iya munyi tu:

Sa, dua, tiga, empat, lima, enam, tujuh!
Enda aku busong miau ka manok sabong,
Enda aku tulah miau ka manok pagah,
Enda aku lesi miau ka manok punga laki!
O, nama deh kabuah aku busong,
Nama deh kabuah aku lunggong?
Kaki aku tu berdiri disegi batu anggong,
Mulut aku udah ngetup kendawan busong,
Lengan aku udah ditanggam beringan lancham selong.
Aku tu endang tiris, enda pantis,
Aku tu endang tambak endang telesak.
Aku ukai nengkebang ukai muntang,
Aku tu bisi utai ditunda,
Bisi utai diselada.

Baka wi nampong tali,
Baka rutan nampong danan.
Oh, aku tu nunda basa Sempulang Gana,
Nunda adat Putong Empat,
Ke berarat naban ka jelatong,
Nunda pantang Belang Pinggang,
Ke sengalang baroh senuyong;
Aku nunda penti antu gerasi,
Berumah ditisi langit demuong.
O ha! O ha! O ha!
Tu baru aku ngangau ka Selampeta ke tau nempa,
Selampetoh ke tau ngamboh,
Selampandai ke tau ngaga kitai!
Aku minta seduai tu beranak betelesak,
Minta seduai iya nyulor baka tubu,
Nelesak baka paku.
Aku minta Petara, Ini Inda,
Ngasoh seduai raja mara diau dimenoa.
Aku minta Petara Manang, Petara Kejakang,
Ngasoh seduai gerai nyamai gayu garu,
Nadai apa-apa nadai nama-nama.

Udah tembu biau nya, baru orang lalu nyibor ka ai tuak ngagai samoa lelaki enggau indu ka begempuru dia. Udah orang ngirup, nya baru orang ke tuai lalu bejako bajar ajar madah ka bagi riph ipar enggau riph mentua ti enda tau disebut nama nitih ka ajar Sengalang Burong. Enti ipar biak ko sida nya disebut adi, enti tuai nya dikumbai ika. Pia mega mentua lelaki patut disebut bapa.

Nambah ka ajar nya orang ke tuai mega ngajar jalai orang melaki bini begulai diau enggau manah, bebasa ka diri sama diri, anang ninding ngapa enggau enda manah enti kelalu enggai

jauh diri melaki bini. Samoa utai ti manah abis diajar orang ngagai seduai malam tu.

Sida mega ngajar anak sida ti lelaki jalai bebasa ka bilik mentua leboh nyundang pinang, ngajar iya megai basa tuai berandau enggau orang ti ngulu iya. Nambah ka nya sida nunjok ngagai iya pemanah basa orang ti udah, ti agi kena kenang orang datai ka kamaiatu, pasal bebasa ka bini, ipar, mentua enggau kaban belayan ripih ari orang ari sapiak.

Udah tembu orang bajar-ajar, orang bukai pen mulai ka diri ngagai ruai tikai diri. Nyadi iya ti bebini malam nya apin tindok enggau bini iya, tang tindok diruai, laban iya enggai ngelengka ka adat tuai. Nyadi enti iya deka tindok enggau bini iya enda ga salah, semina iya enda berapa manah dipeda mata orang laban, nya bisi ngelengka ka adat tuai kelua.

Lepas nya ba hari seduai melaki bini ke nyundang pinang nitih ka penyampau sirap pinang seduai, hari siti kejang deka nemuai ngagai rumah indu, sida sabilik kiroh begaga ka penganan enggau belulun ka asi pulut kena nemuai tu.

Nyadi pagi hari ti nyundang pinang sida mupok lalu dianjong apai lelaki nya. Datai sida ba rumah indu, sida lalu dilalu ka apai indai indu, samoa utai ke dibai sida dibai ka bilik indu samoa.

Apin lama sida udah niki, samoa orang ti bisi dirumah bela ngulu magang. Nyadi malam nya, udah badu makai lemai nya baru orang sampal enggau indu enggau anembiak ngulu kia ka magang, indu ngulu indu ka bilik, lelaki ngulu lelaki seduai apai iya diruai.

Leboh berandau nyundang pinang, lelaki ti nyundang pinang nya enda kena sakali kali dudok nyandih ari pantar, tang iya

nyandih ba tiang penyandih nunga bala orang ke tuai enggau mentua iya empu ke dudok ari atas.

Malam nyundang pinang randau orang besai, sida berandau ka adat, berandau ka burong kena bumai enggau kena pegi enggau ngayau. Nambah ka nya sida lalu bejako ka jalai manah kena orang ngidup ka diri diau dimenoa.

Agi kelia leboh lelaki nyundang pinang endang jalai mentua iya nguji menantu iya berandau mungkau ka siang datai ka tiga, lima enggau tujuh malam beturut.

Tang sabengkah agi adat ti enda tau enda dikereja lelaki leboh iya nyundang pinang tu nya ngambi kayu enti hari tawas. Kereja tu endang adat kenau ari kelia ingkah.

Pengelama laki nya enggau bini iya diau dia ngelama seduai ka dirumah lelaki tadi. Uдах hari nya genap, nya baru sida mulai ka diri ngagai rumah lelaki, lalu lubah nemuai agi, enti enda nyau lalengau. Penemuai bukai uдах tu nya nadai sekat maia enggau pengalaman agi, sabarang maia bisi hari.

BASA ENGGAU MENTUA ENGGAU IPAR

UDAH IBAN bebini belaki, bini tauka laki enda tau enda angkun ka mentua sakalika kaban ipar tuai tauka biak ari iya. Menantu, dalam adat Iban enda tau sakali kali nyebut nama mentua. Kabuah enda tau mali busong, reti nya mali sial diau dimenoa ba ngidup ka diri bumai betaun. Pemali tu datai ari ajar Sengalang Burong enda ngasoh bala menantu iya nyebut nama iya empu ti mentua sida. Nyadi naka orang agi ka mentua nya tiga kali patunggal enggau apai indai bini tauka apai indai laki iya empu. Nyadi serak ka empat kali patunggal mentua iya nya naka mentua basa.

Nitih ka penyiru adat tuai Iban, kaban ipar enti sida biak agi ari laki tauka bini iya, sida dikumbai adi. Enti sida tuai agi, sida dikumbai ika. Pia mega mentua ke lelaki dikangau ka bapa sakalika aya, lalu iya ke indu dikangau ka indai tauka ibu.

Adat ka manah enti lelaki nguai ka bini iya, sakumbang iya apin beranak, iya apin deka dulu ari lelaki bukai sarumah dia pulai tindok ka bilik begulai enggau bini iya. Kereja ka baka tu ukai mali, tang iya endang basa tuai dulu.

Pia mega ba penyikar diau iya enggai meda para kurang kayu enggai ka asi pandok bini iya mata.

Nambah ka nya utai dulu patut dikereja lelaki ke bebini nguai ka orang, iya enda tau enda belajar ngiga lauk, awak ka orang ti endor iya datai tau berasai bisi penyamai. Lelaki nya nadai asai, enti bini iya bengat enda kala nyambut utai ulih iya turun ka babas.

Nyadi basa lelaki ti bebini nguai ka bini iya, enti iya deka enggau orang mindah jauh tauka deka enggau orang pegi, iya enda tau enda madah ka ati diri ngagai bini, ipar enggau mentua iya ti enggau iya begulai. Nyadi enti orang ngumbai diri tekapoh ka pengawa tinggal iya ti mindah nya baru iya tau ninggal ka rumah enggau ati lantang. Tang enti orang madah ka diri enda tesangkong ka bini anak iya, iya enda tau ninggal ka rumah nitih ka pengerindu ati iya empu. Pia mega ninggal ka rumah endang enda ari padah dulu endang salah besai.

Nyadi basa bukai begulai enggau mentua enggau ipar, iya ke orang datai, indu tauka lelaki, enda tau enda megai ati ti manah enggau nelap enggau sida. Nyadi enti iya jai ati enggau deka magi diri ba maia apin patut beserara, nya semina medis diri empu, lalu iya mega deka dikumbai orang nadai basa enggau enda nemu adat.

BASA MAKAI

LEBOH ORANG bisi makai begulai enggau kitai, tauka enti orang bilik sapiak sapiak ke semak kitai benong makai, kitai ke semak nya enda manah bendar ngensing ka insak tauka ngelua ka daak, tauka nyebut utai kamah. Samoa orang ti nyebut utai baka tu tauka ngereja iya semak orang makai, nya orang ke dikumbai enda manah adat diau. Iya tau dikumbai orang kurang ajar.

BASA MANSA MOA ORANG

KENYAU ARI turun menurun Iban manah bendar basa leboh bejalai mansa moa orang. Sida enggai lejah-lejah bejalai, tang nyirong ka jari ngagai paah ngena jako, "ngadang dulu, aku mansa moa nuan tauka kita." Orang ti kena pansa lalu nyaut, "Mansa meh." Basa ti bansa tu manah bendar dikena bansa Iban masa diri sama diri. Orang ti megai pemanah tu tau kena puji enggau dikumbai nemu adat. Nyadi orang ke lejah lejah nya dikumbai nadai basa enggau enda nemu adat.

BASA ENGGAU TEMUAI

NYADI MENSIA nadai siko enda minta basa orang. Lalu laban deka dibasa, nya kabuah sida berebut deka lebih ari pangan diri ba pemagas, ba pemulih utai, ba pemerani, ba nyemekih diri sama diri bumai betaun, betanam enggau betupi, awak ka dibasa orang, sereta awak ka bisi utai kena masa orang bukai. Nya alai laban utai tu besai bendar ba ati bansa Iban, nya kabuah sida enggai alah rita pemanah basa ari diri sama diri, lebih agi ari diri sama bela ti serebak umor.

Adat Iban enti temuai bisi mansa pengkalan tauka kaki tangga, temuai nya dibai niki ka rumah. Enti iya niki, samoa

orang ti kena pansa iya ruai nadai ngenong, tang bela nudok ka iya magang. Pia mega enti temuai nya dudok, orang ke empu ruai endor iya, lalu kamaia nya nganchau tikai ke manah agi ka endor iya dudok. Nambah ka nya mega, baku sarang pinang pen lalu disedia ka, awak ka temuai ngilum pinang ka diri empu. Nyadi meri temuai makai pinang nya, endang tabi bansa Iban enggau orang ke dudok ba ruai tauka dibilik iya.

Nyadi adat basa Iban nemuai, enti iya temuai biak lalu nemuai pulai hari, ko ajar orang ke tuai, iya patut dudok ngalih ari ruai, reti nya nyandih ba tiang penyandih, moa nunga ka pantar, berandau enggau orang ke datai ngulu iya. Kabuah penudok iya bakanya, awak ka iya ngelalai ka moa enggau ati diri ari sida ke dara, enti sida bisi bejalai niti tempuan. Tang enti iya temuai besai tuai, endang adat iya diasoh orang ke empu ruai dudok ngalih ari pantar nunga ka ruai digulu orang ti ngagai iya.

Nyadi enti temuai ke biak nyau bemalam nemuai, nyau berandau malam hari enti orang nyau ngasoh iya dudok ari atas leboh maia berandau, nya baru iya tau. Tang randau iya nitih ka pemendar jako orang ti ngulu iya. Nyadi enti orang ti ngulu iya semina naka bungah enggau iya, jako bungah ga kena iya nyaut orang, laban iya agi anembiak. Tang enti orang bendar nanya ka rita ari iya, iya mega enggau naka ulih nyaut tanya orang enggau rita ke bendar. Nyadi enti temuai tuai nemuai bemalam nya baru randau orang empu rumah maioh enggau iya, laban iya diadang orang maioh utai temu laban iya dijangka orang suah mindah jauh, maioh utai udah dikereja, enggau nemu jako tuai bansa diri.

Nyadi enti temuai datai semak tengah hari, orang ke alai iya datai enda tau enda lalu nanya ka pengudah iya bebela. Enti iya apin mela diri, orang ke indu enda tau enda awas berapi ka iya. Pia mega enti temuai niki baroh hari, endang adat iya lalu

ditan ka bemalam, enggai ka iya tusah merau tauka bedarat ngelaban malam. Tang basa enggau orang ke datai bedagang enda tau diserama ka enggau tu, laban iya ukai temuai.

Nyadi orang ti datai nemuai ngagai bilik orang ti enda masai iya, enda manah sakali kali nyerangkap bilik orang, reti nya salah, enti iya berandau dibilik. Kabuah iya bakanya laban bilik ukai endor temuai ke lelaki.

Nyadi Iban ke enda iboh ka temuai, nya enda manah adat, lalu orang ti bakanya, dikumbai kitai "tinggi batu tungku," reti nya rangka. Orang ti rangka enda beradat baka tu deka dikenang orang, datai ka orang ti besai ati enda rindu betampil enggau anak uchu iya. Lalu laban pangka rangka nadai reti tu balat bendar jai ba ati Iban, nya kabuah samoa Iban ke megai basa enggau pemanah sereta enggau penelap tuai, jarang bendar deka rangka.

Nyadi basa orang ke tuai dulu menya enggau temuai besai bendar. Enti temuai nya enda dikelala, lalu enti iya agi biak, iya dikangau ka Igat, Dom, tauka Watt. Nyadi enti temuai kira saumur enggau orang ke bejako enggau iya, iya dikangau ka unggal, enti umur iya tuai agi, iya dikangau ka aya, lalu enti iya nyau tuai bendar, iya dikangau ka aki. Pia mega enti temuai nya indu, iya deka dikumbai endu, endun, wai, iyak, unggal, ibu tauka ini, nitih ka penuai umur iya.

Baka nya mega jalai ngulu temuai. Enti rumah bisi temuai, ka siko iya pen temuai ba ruai orang, orang ke empu ruai semak nya, endang adat mai iya makai leboh maia makai. Leboh enda maia makai lebih agi nyau malam hari endang ka baka ngulu temuai samoa, ninga ka randau enggau rita iya. Nyadi enti temuai nya indu, iya digulu sida ke sama indu dibilik. Lelaki enda ngulu iya enti iya ukai tak kaban belayan sida. Nambah ka nya enti temuai indu nya udah bekau gama iya, enda manah lelaki enggau ngulu iya ka bilik ti endor indu nya digulu orang.

BASA LEBOH MERAU ENGGAU PEGI

NYADI ENTI anembiak nitih ka orang ke tuai pegi, sida enda manah sakali kali enggai ngeluan tauka ngemudi ka perau. Nyadi orang ke tuai sida nya diator dudok ba ruang timba.

Enti perau sida sangkai, iya ke ngeluan lalu kamaia nya terejun nanchang ka tali perau. Ba maia bebantai enti barang nadai maioh, orang ke biak endang enda mai orang ke tuai mantai ka utai.

Udah barang dibantai ka, orang ke biak lalu beramu ka langkau begiga ka lauk lalu ngambi kayu kena kerapi.

Udah siap magang samoa utai, barang ti berapi nya berapi, barang ti belangkau nya belangkau. Orang ke tuai ngajar orang ke biak ngereja pengawa, enti orang ke biak apin nemu ngereja iya. Enti sida endang udah apal belangkau, orang ke tuai semina ngemata ka aja. Bakanya mega berapi dirantau ai orang ke biak enggai ngasoh orang ke tuai.

Kabuah orang ke biak deka gawa nyangkong orang ke tuai, laban sida deka ka nama enggau empu basa ke manah. Ari sida bebasa enggau bagas, bakanya mega sida enti udah tuai ila, deka disangkong lalu dibasa orang ti biak agi ari sida.

BASA ENGGAU TUAI BANSA

SABAKA ENGGAU bansa buhai, bansa Iban endang bisi asal orang ti waris megai menoa. Nyadi orang ti waris tu endang dibasa Iban bendar. Nyadi basa ke nyata diberi orang ngagai sida diasoh orang munoh babi enti orang bisi jadi melaki bini ngudi menoa enggau ngaram ka tubai leboh nubai besai.

Bakanya mega endang kenyaau ari tuai dulu bansa Iban endang bebasa bendar ka orang ti megai rumah, megai umai taun

enggau megai menoa. Kabuah sida bebasa ka sida tu, laban ba pengawa enggau ba penusah, enti bisi utai nuntong bansa, runding sida deka ditanya enggau didinga ka, ti orang deka nyakang sakalika enti utai nya patut dititih ka enggau enda.

Nyadi kamaiatu ati bansa Iban bedau narik ka basa tu. Sida keras bendar deka betuai enggau masa tuai bansa sida empu. Sida nemu enti sida enda masa tuai diri, orang bukai ke enda empu tual, tentu enggai agi masa tuai sida.

Bakanya mega tuai bansa, sida enda tau semina nat ka basa anembiak diri. Side empu mega enda tau enda masa anembiak, ninga ka sida enti pikir sida manah, lalu kasih ka sida ke enda nemu, sereta ngungkup ka utai ke manah dikereja orang ke temu tau ngereja iya. Enti basa tu dipegai tuai bansa enggau anembiak redak, bansa Iban belama-lama iya deka menyana berari ari ninting jeman.

BETENUN

NYADI INDU mansang balat agi ngemeran ka pengawa betenun leboh iya udah belaki. Kabuah alai iya bakanya:

- (a) Ngambi ka bisi pua kena nyerayong sapat enti diri sabilik bisi parai,
- (b) Ngambi ka bisi kena nyerayong pandong enggau meligai enti bisi gawai umai, gawai tajau enggau gawai sakit.
- (c) Ngambi ka bisi kena ngelagu rumah enti bisi pengawa besai, enggau
- (d) Ngambi ka bisi kena nyambut antu pala enti laki iya bedengah leboh ngayau.

Iya nya endang niat ati samoa indu Iban mega deka nyadi indu ti kena puji dalam pengawa megai ubong. Sida ngajih ka diri tau nyadi indu takar, indu ga'ar, indu tau muntang tau

nengkebang, reti nya nyau tau gawa enda agi ngena teladan. Nyadi pun indu nemu ngembun ngulai ubong enggau engkala burong, jangit, minyak kepayang enggau urat engkudu nya ari ajar Ragam indai Manang Jarai.*

Nyadi nama buah pua ti dikereja indu ti betenum maioh macham. Pia mega ukir buah pua sida nyau ka datai saratus macham namang maioh macham utai bap langit. Nama buah pua sida ti besai agi nya baka tu:

- | | |
|-------------------|---------------------|
| 1. Lebor Api | 9. Bali Belumpong |
| 2. Bali Begajai | 10. Bali Berinjan |
| 3. Kumbu Muau | 11. Bali Belulai |
| 4. Bali Berandau | 12. Bali Menyeti |
| 5. Remang Berarat | 13. Bali Tengkebang |
| 6. Kayu Betimbau | 14. Bali Kelikut |
| 7. Bandau Nulang | 15. Bali Sapepat |
| 8. Bali Mensuga | 16. Kumbu Rayong |

Nyadi nama buah pua ditunen kena orang besandik baka tu:

- | | |
|------------------|---------------------|
| 1. Begajai | 6. Engkatac |
| 2. Leku Sawa | 7. Igi Nibong |
| 3. Manang Iling | 8. Tangkong Sapepat |
| 4. Orang Chayam | 9. Kara Jangkit. |
| 5. Gerama Murong | |

Nyadi agi kelia leboh ubong apin bisi dimenoa tu bansa Iban endang nanam taya kadiri empu ba empalai, udah empalai nya tembu ketau. Ari taya ke ditanam sida nya, ari nya sida bulih ubong ka ditunen sida ka pua enggau ka kain, baju enggau sirat. Kamaiaitu enti kitai nemuai ngagai sadau rumah panjai Iban agi kitai tau meda pemigi taya enggau gasing kena sida ngasing ubong kelia.

* Tau dibacha dalam buku ke dikumbai "Raja Durong".

BUMAI BETAUN

NYADI LELAKI udah iya bebini, iya udu agi ngemeran ka diri gawa nebang nebas, awak ka ngidup ka bini anak enggau apai indai iya ti ditampong iya bilik. Iya lalu belajar ka burong bumai enggau jalai ngereja umai kenyaau ari maia manggol ngagai nyau nyimpan padi ka sadau ka, udah tembu beribut ba ujong taun.

Nyadi pasal ba mela umai, pengawa lelaki nya nebas enggau nebang, nugal enggau berangkut. Nyadi indu balat agi ari lelaki ngemeran ka pengawa menih, mantun enggau ngetau. Leboh ba maia ngindik indu ngeruman lalu lelaki ngindik. Ba maia beribut lelaki ngayak padi lalu indu niup enggau peniup.

Nyadi kabuah alai indu enggau lelaki bisi bagi pengawa dikereja bakanya, laban sakumbang indu ka mantun enggau ngetau, lelaki ngereja pengawa bukai awak ka bulih duit ka belanja bilik.

PENGAWA RERAK

NYADI BA pengawa redak kena ngidup ka diri lelaki Iban ngereja pengawa ti berat agi baka ngambi kayu kena berapi lalu indu nutok, ngisar, nyauk enggau berapi. Iban enda ngena enti iya ngasoh bini iya ngereja pengawa berat enti iya nadai penyakit.

MAIN ENGGAU UTI

NYADI SAMOA Iban ti lelaki kenyaau ari sida agi mit endang bisi main enggau uti bansa ti dikereja sida. Leboh lelaki agi biak, lepas ari maia sida ti sula-ula, sida lalu nemu enggau orang ti besai tuai bepangka. Kayu diambi sida ka pangka nya kayu malam, bait, engkerutak, mengeris, kempas enggau tapang. Maia sida bepangka ari maia nebas ngagai belanggang ka reban.

Kabuah orang bepangka nya lebih agi enti ba maia nebang, laban ngayu ka kayu jampat agi rebah ditebang.

Lepas ari main bepangka, iya nya endang uti besai bansa Iban nya nyabong manok. Nyadi penatai sida rindu ka uti tu laban nunda uti dipungkal Raja Machan ti belaban nyabong enggau Ambong Mungan enggau Ensing Jara ke nyabong ngelaban sabayan. Nambah ka nya mega sida nitih ka uti sida Keling sida Sengalang Burong ti belaban nyabong ngelaban Apai Sabit Bekait.

Samoa antu ti belaban nyabong tu bemanok sabong ka mensia magang. Lalu laban mensia jadi ka manok sabong antu, nya mega kabuah mensia bisi bulu, baka bulu manok ka disabong mensia ngelaban diri sama mensia. Ari tegal tu, nya kabuah samoa macham bulu manok ditemu Iban samoa, laban sida endang bisi penemu nya datai ari asal pengarap sida.

Nyadi maia Iban nyabong nya ari maia nebas ngagai kejang deka nunu. Sabong sida tu kelia sabong bebuti ti dikumbai sida 'Sabong Taun'.

Laban nunda main tuai lalu laban sabong tu nunda uti antu, nya alai agi kelia enti malam orang deka nyabong, orang ke tuai sabong ngasoh lemambang dua iko besaut-saut berenong ngangau ka renong kayau nyebut sida Keling sida Bunga Nuing ti ngayau ngelaban apai Sabit Bekait. Lalu pia mega laban kayau sabaka enggau sabong, nya alai enti Iban deka nurun ngayau tuai kayau ngasoh lemambang berenong ngangau ka renong sabong nunda sida Ensing Jara ti nyabong ngelaban sida Ngerai sida Niram ari Sabayan. Leboh orang ngangau ka renong sabong tauka renong kayau piring enda tau enda bisi sedia, laban nama antu ti nyabong tauka ngayau abis magang kena sebut leka main.

Nambah ka uti asal main dua bengkah nya tadi, mairoh main bukai mega, ti dikereja sida kena ngelantang ka ati diri diau

begulai dalam rumah panjai. Sida ninting hari begendang panjai enti rumah enda ngulit, awak ka orang ti landik bermain, baka sida penikar tau bepencha, bekuntau, main chekak, main kerichap, main pirin, main perisai enggau ngajat. Nyadi ajat tu bisi dua macham, ajat samain enggau ajat bebunoh. Nambah ka iya ti endang dimain ninting hari ninting lemai, main tu deka bendar dimain orang leboh nembu ka gawai enggau leboh bansa Iban bisi rami begempuru.

Nyadi laban nunda pengarami rumah sida Keling di Panggau Libau enggau rumah sida Tutong di Gelong, nya kabuah rumah panjai Iban enggai nyadi sakali diuan, enti iya enda dilagu enggau gendang enggau taboh, kena orang bermain munyi ti disebut datas nya tadi. Pia mega baka gendang bukai, anembiak Iban enda tau enda belajar, laban rumah panjai enda tau enda megai adat tuai baka ti niri ka maioh macham gawai ti berguna ka gendang rayah, gendang kena ngalu antu leboh gawai antu enggau nempap ketebong kena gawai burong enggau dikena ngalu Menjaya Raja Manang leboh begawai ka orang ti sakit enggau leboh manang bisi bebangun tauka bisi belian besai. Samoa macham main enggau penemu asal begendang enggau betaboh tu endang pesaka besai dikembuan orang ti diau dalam rumah panjai, kena sida megai enggau ngingat ka adat asal bansa sida. Enti orang diau begulai dalam rumah panjai enda ngingat ka utai tu, bansa sida deka abis main enggau abis adat bansa, ti tau bendar ngemalu bansa kadudi hari ila, laban adat bansa udah dilengka ka ari tegal pengelap rambau ti muai iya.

Nyadi main bukai baka bepatis, bebatak lampong, bebatak tali, bibat, bepancha, bibat lengan, perejok atak, perejok panjai, sipak raga, engkechit enggau berumpak belanda niki bukit nya endang raban uti bansa Iban. Samoa main ti dikereja sida dirumah, nya dimain sida leboh maia gawai, lebih agi kejang gawai deka tembu. Nambah ka nya kena sida nguji ka pemerani

ati anak lelaki, suah bendar orang ti tuai ngasoh orang ti biak nganjong utai ka pendam tauka ngambi utai ari nya.

NYADI TUAI PEGI ENGGAU KAYAU

NYAU KEPUAS anak lelaki ke udah nitih ka orang pegi, lalu udah mega kala bulih reta leboh enggau orang mindah, enti iya dipeda orang lurus enggau manah ati, enti umor iya nyau tuai agi, iya lalu diasoh orang jadi ka tuai ngereja pengawa nya.

Nyadi enti iya nyau diasoh orang jadi tuai ngulu ka anembiak belayar, iya enda tau enda belajar bendar ka burong enggau mimpi kena ngulu ka orang mindah. Nambah ka nya mega iya enda tau nadai perau pelayar kadiri empu, laban enti enda baka nya iya apin bisi utai kena ngulu ka orang.

Nyadi nama orang ti ngulu ka orang pegi kelua, enti belayar nebing kiba lalu nyemerai tasik ka Malaya, Sumatra, Jawa enggau pulau buhai tunga kia ka, iya dikumbai orang 'Pengulu'. Nyadi enti iya ngulu ka orang belayar tunga ka tebing kanan nunga ka Saba enggau Mindiano iya digelar orang 'Nakoda'.

Nyadi orang ti nyadi tuai kayau tauka orang ti ngulu ka orang nyerang nya apin iya dikarap ka orang jadi tuai, iya enda tau enda dulu ngayan ka diri berani sereta tau dikarap ka orang ari iya dulu jadi ka manok sabong tuai ke dulu agi ari iya matak anembiak ngayau tauka nyerang. Iya mega enda tau enda nemu burong enggau mimpi kena matak anembiak ngereja pengawa tu, apin iya dititih ka anembiak. Enti enda baka nya orang enggai nepan perau iya tauka endang enggai nitih ka kayau iya.

Baka nya mega indu bini orang ti raja berani, sida enda tau enda ngiga pemandai enggau pemanah ati ti lebih ari bini orang buhai. Kabuah pia, enti sida enda pandai, nama chara sida nyambut dengah laki sida enti sida nadai pua udah ditenun diri

empu, enggau kati ko iya tau jadi ka tuai indu bukai enti ati iya jai, rangka enggau peninding. Nya alai samoa indu ti jadi enggau orang ti besai pengawa baka nya enda tau enda enggau naka ulih ngaga samoa utai ke manah awak ka iya tau nipak pemerani enggau pemesai laki iya.

SAKIT

Nyadi enti Iban bisi enda gerai enda nyamai, utai dulu dikereja iya minta Petara ngubat iya nya bedara mata dibilik. Pengawa tu mit laban nya semina miring ka Petara dibilik diri empu lalu tau enda iboh asoh temu orang bukai kasetak-setak.

Nyadi enti enda ga gerai laban nya, iya tau bedara mansau. Leboh iya bedara tu iya tau miring ba pantar ruai sida empu, ti alai iya bisi madah ka tuai tuai sida sarumah ngasoh orang miring.

Udah bekau main bedara enti iya ke sakit nya enda ga gerai, nya baru iya tau minta ubat dukun. Enti dukun enda tubat ka iya, iya tau ngambi manang ngasoh iya belian. Udah bekau pelian ka manag enti iya enda ga gerai iya tau nampok sakalika niri ka gawai sakit. Leboh iya begawai tu iya tau pinta pesugi ka lemambang tauka diperenong sakali ka dipengap, ni utai ngena ko runding sida ti berunding ka pengawa nya.

Leboh orang ke sakit bisi mimpi dipinta antu makai di ruai, iya lalu ngereja pengawa nya enggau sida sarumah. Tang enti iya bisi mimpi lalu diasoh pansut ka tanju, pengawa nya dikumbai Gawai Sandau Hari tauka Gawai Mata, nya ngadi pengawa Gawai Burong. Kabuah iya dikumbai Gawai Mata, laban sakali aja ka tanju.

MATI

ENDANG KA baka mensia enti lama udah sakit, udah iya diperubat ka enggau naka ulih enda ga iya gerai, iya enda tau enda mati.

Sereta orang ke mati nya apus seput, bala sida sabilik enggau kaban belayan ti dia nyabak magang sinu ka iya ti udah ninggal ka dunya. Leboh orang nyabak, sida lalu nanggam mulut enggau mata iya. Uдах tembu tanggam nya baru meri iya mandi, lalu alu mega dipelintang ka orang ba pala tangga ari setak-setak rumah, enggai ka sabayan ti begau ngambi samengat orang ti mati nya, pulai ka sabayan, niki ka rumah.

Uдах iya diberi mandi nya baru orang ngari ka iya enggau naka pemanah ngepan ti di kemisi ka iya. Kening iya pantang enggau kunyit tiga pantang, ngeli iya digelintum enggau beloh besi, kaki iya lalu taur enggau benang mansau.

Uдах tembu nya sida iya sabilik lalu maiya iya enggau macham utai kena iya idup disabayan din. Uдах sedia samoa baiya iya, nya baru orang nanggong bangkai iya ka ruai ti lalu diengkah dalam sapat ti udah digaga bala lelaki bukai ti enda ngereja pengawa bukai dibilik tadi. Utai kena orang ngelagu sapat nya pua kumbu magang.

Leboh sida ngali ka iya dalam sapat tu, pala iya diator nunga ka pantar. Tang leboh orang ti mai iya ari bilik tadi leboh sida datai ba moa pintu bilik, dia sida ditabor enggau leka padi ari tangga sadau. Kabuah alai nabor iya enggau leka padi awak ka sida sabilik di menoa tu enda rua pemakai. Pia mega sereta iya udah datai dalam sapat, siko ari sida sabilik enda tau enda bisi jaga bangkai dia enggai ka iya diperaka ukui tauka mayau. Orang ti dalam sapat salalu nyabak sinu ka iya ti udah mati ngena leka sabak kenang.

Uдах tembu pengawa nya endor tuai bilik orang ti parai ngempuru ka sida sarumah baum berunding ka buah rumah ti kena ambi sida rabat tauka nyenggai antu nya. Uдах sida berunding ka nya, siko dua sida bepadah kulu kili, madah ngagai rumah orang ti semak enggi sida maia malam nyenggai

antu. Sida ke bepadah enda tau niki ka rumah orang laban nya mali nitih ka adat tuai dulu. Ari rumah ti nampong, nya baru padah nya betampong tampong, tang orang ti nampong nya tau niki ka rumah, laban sida enda nurun ari rumah orang ti mati tadi. Nyadi nyenggai antu abis lama tiga malam, tang malam ti penudi iya bendar nya meh malam ti nyenggai antu. Ba malam bukai ke dulu ari nya semina kaban belayan ti semak agi bisi datai enggau sida sarumah ngintu pamarai.

Nyadi enti orang ti parai nya tadi mati malam, pagi siti nya baru sida sarumah enggau orang bukai ke bisi kena padah ka beban lalu beban santubong. Utai diban orang kelia ka santubong nya kayu rian, berangan, tegelam, menuang, tauka teras belian. Leboh orang beban tu, semina orang ti empu pemat ngada ka asi eneggau ai enti orang beban ditanah. Nyadi enti orang beban dirumah nya baru orang sarumah nya bela nanggong asi enggau ai diri ari bilik diri leboh merarau tengah hari. Kabuah alai pia, laban kamaiatu orang ti nyenggai antu nyau bebunoh ka babi enggau sapi, lalu perut jelu tu endang ditaga ka lauk bala maioh ti beban sahari nya. Endor orang makai leboh hari beban endang diruai.

Nyadi malam orang ti nyenggai antu ke penudi iya tu kira ari pukol lima satengah lemai nya orang ti diambi nyabak lalu berengkah nyabak dudok ba kerusi mangkang piring dalam sapat. Nyadi orang bukai ti datai nyenggai antu datai ba rumah nya kejang hari apin petang.

Nyau kira pukol lapan malam nya baru samoa orang ti datai dipedijir ka magang diruai laban orang ke empu rumah nya deka meri makai asi. Uдах tembu orang makai asi tu, orang nadai pengawa tang dudok berandau dibelah ruai ka setak-setak enggau orang ti empu ruai.

Nyau kira pukol sapuloh malam nya baru orang bedijir baru makai kupi enggau roti. Tembu nya orang ti empu pemat pen

lalu ngempuru ka orang ti tuai-tuai ngagai ruai iya, laban iya nyau deka bejako ka pasal pemat i orang ti parai ngagai orang maioh. Leboh sida bejako ka tu, dia sida lalu ngator pana enggau adat bukai kena ngintu pemat i.

Udah tembu bejako ka adat pemat i, orang ti empu pemat i lalu meri orang ai arak ti manah agi ti ditambah ka enggau bear tauka remenit. Tembu nya baru orang bebatak baru ka setak-setak nyendia ka makai asi ba pukol dua belas malam.

Udah tembu makai asi orang nadai pengawa ti benama dikereja, tang sakeda orang berandau enggau diri sama diri sebelah ruai ka setak-setak, lalu orang ti tuai agi dudok ba ruai orang ti mati ninga ka tukang sabak nyabak. Pia mega orang ti indu enggau dara-dara enti leboh ke ukai maia jam makai asi enggau ngirup kupi, pansut ka ruai lalu dudok semak sapat ninga ka tukang sabak nyabak.

Nyadi kira pukol dua satengah dinihari dalam orang ngirup kupi baru. Udah tembu nya orang nadai nama pengawa dikereja tang agi berandau enggau pangan.

Pukol empat pagi nya orang lalu bedijir baru nyendia ka deka makai asi. Udah tembu makai, nyau kira pukol lima satengah orang ngiling antu. Tang apin iya digiling iya dulu diberi makai. Udah iya diberi makai, chapak enggau mangkok ti kena meri iya pechah ka, lalu kerimpak purok ka lubang.

Udah orang tembu nyimpan antu orang pen lalu nyan santubong mansang nganjong iya. Sereta santubong udah angkat api ti ditungkun ka ba kaki iya diba i orang ti dulu, sereta keda bai orang pulai ka bilik ka dikena sida nungkun api tiga lima tauka tujuh lemai beturut udah nya ti dikumbai 'Lemai Tungkun Api'.

Pia mega kejang santubong deka disan orang, amau api ba dapor dikaki iya tadi tabor ka mimit ngagai santubong. Nyadi

leboh nganjong antu, ruai orang ti dulu ngentak enda sakali kali tau kena peraka santubong. Keba deh laban ruai orang nya endang ba tengah rumah, jalai orang nganjong antu enti orang ti parai nya ngalih ari rumah ari ulu, iya dibai orang nengah jalai ka ari ulu; nyadi enti ruai iya ngalih ari ili, iya dibai ka tanah ka nengah jalai ari ili.

Nyadi utai kena orang mai antu ka pendam, nya nitih ka endor pendam. Nyadi enti pendam nya ari ulu tauka ari ili lalu kena pansa orang merau, ngena perau orang ngundan santubong. Nyadi enti iya nadai jalai merau, orang ti nganjong antu nyan santubong nya dibai bedarat.

Leboh santubong datai dipendam apin orang numbak lubang, tanah ka endor numbak ka dulu digenselan enggau darah manok. Bangkai manok ke kena ngenselan tanah nya tadi lalu dipandok orang ti berapi dipendai ka lauk orang ti nganjong antu. Nyadi kejang orang deka berapi samoa tuboh ti enggau nganjong antu ditiap orang dulu ngena pating kayu ke dikumbai orang kelakar.

Penalam lubang Iban ditumbak dipendam nya enda tau mabu agi ari enam kaki. Uдах lubang chukop dalam, lubang diberesi laban daun idup enda tau diengkah baroh santubong. Pemali nya, enggai ka iya ti parai nya ngemba orang ti idup.

Uдах siap lubang nya baru orang ngulor santubong, uдах nya baru nyimpan baiya kering ka dalam lubang. Tembu nya baru lubang ditambah orang manah-manah enggai ka tanah berubah. Ba runding Iban enti lubang orang ti uдах parai dipendam nya lengkap, nya nunjok ka pemansang ruang bilik ke ditinggal ka iya dimenoa deka surut tau ka matak ba pemansang. Nya alai laban nya mega kabuah Iban ti nganjong antu enda tau enda jimat ka nambun lubang orang ti uдах mati.

Uдах lubang tembu tambun ba pala orang ti uдах parai nya diengkah ka orang tajau baru tauka irun sakalika kebok kena

nanda lubang nya. Uдах nya baru langkau kajang gaga ka orang lalu dalam langkau nya engkah ka orang baiya iya ti tau burok baka tikai penindok enggau utai bukai ti dibai iya, ti enda mega disimpan dalam santubong enggau enda disimpan dalam lubang.

Tembu nya orang bela pulai magang ngagai endor orang ti berapi di ai. Apin sida ninggal ka pendam sida dulu ngaga pengait mit siti siko kena ngait samengat pulai ari pendam. Nyadi orang ti empu pemati ti dudi ninggal ka pendam lalu ngaga serepak buloh, serepak tu ditanam iya tunsang ba jalai tisau pendam, enggai ka samengat iya ti udah parai nitih ka sida ti pulai.

Uдах samoa orang ti nganjong antu datai magang ari pendam, sida lalu berengkah makai. Uдах tembu makai nya baru orang bela mulai ka diri samoa ngagai rumah diri empu.

Nyadi orang ti empu pemati, leboh bala sida datai dirumah, udah sida mandi, sida lalu begempuru ba bilik orang ti parai nya. Leboh begempuru tu dia orang ti makai pana lalu makai asi chelum tiga lima tauka tujuh suap dirintai ka atas duku nitih ka pengelama pana ti diator sida. Tembu nya baru nelenga ka telenga atap, tang enti pana nya pana petang bilik lalu diasoh petang sepengalama pana nya agi. Semadi iya pana benda nya baru iya lalu ditelenga ka sida pagi nya. Enti pana tu pana benda laban orang bukai dalam rumah nya enda ulih enggau orang ti empu pemati ngibun pana, sida nyurong ka benda. Penyampau benda beri sida nitih ka pengelama pana. Enti pana tiga hari benda iya sigi jabir, enti pana lima hari benda iya sigi panding lalu enti pana tujuh hari nya baru benda iya sigi alas.

Uдах ator pana diadu ka nya baru lalu nambit ulit. Nyadi enti orang ke mati nya lelaki, utai ditambit orang dalam ulit nya

pelaga, rangki, simpai enggau sakeda pekayan lelaki ti mit ti tau disimpan dalam boon. Nyadi enti orang ti mati nya indu perengka indu ga simpan orang dalam boon nya. Uдах perengka nya disimpan, boon nya lalu ditudong orang enggau pinggai tauka chapak sereta lalu ditambit rat ka enggau rutan, udah nya lalu biau enggau manok ngambi ka ulit nya chelap embab. Uдах nya baru orang naroh ulit nya ba telok tajau enggai ka kena tegu orang ti gawa sabelah nya dia.

BESARARA BUNGA

NYADI MAIA orang besarara bunga enggau orang ti udah parai, udah ulit iya diketas, iya nadai timpoh minggu tauka bulan, taja mega pengawa nya manah agi dikereja enda bengat tau lama udah ulit diketas. Kabuah alai orang enggai tentu laun besarara bunga nya, beguai ka iya ti udah parai jampat agi beserara samengat enggau sida iya sabilik dimenoa tu. Enti iya agi ingat ka sida iya sabilik ti agi idup, sida ti dikenang iya nya deka bendar sakit, sereta enggau pemakai sida pen deka bendar rua. Nyadi orang ti laun besarara bunga ukai tegal sida enda nemu tu, tang laban ati sida bengat kelalalu sinu ka iya ti udah nadai agi, nya kabuah sida laun.

Nyadi orang diambi ngereja beserara bunga tu manang. Dalam leka pelian iya, manang mensiang bunga sereta nyerara iya ti udah parai ari sida iya sabilik dimenoa tu.

Malam manang ti belian tu, samoa orang sarumah dia begempuru magang ngagai rumah orang ti belian. Tengah malam sida makai salau, tang kejang deka makai, manang dulu muai asi ka lubang ti dikumbai asi pedara. Enti iya apin muai pedara nya, orang maioh apin tau makai.

Nyadi pagi siti orang sarumah apin tau gawa laban adat manang apin ngasoh. Pengalama sida diau ka sahari aja.

NGETAS ULIT

NYADI PENGALAMA ulit ditanggam tiga bulan. Sakumbang rumah orang ti agi ngulit, orang dalam rumah nya nadai tau begendang, enda tau manjong, enggau enda mega tau bengepan ngena gari ti bebunga enggau mansau. Nyadi enti sema rumah sida bisi pengawa ke enda tau enda dikereja ngena gawai sakumbang ti agi ngulit, orang ti niri ka gawai enda tau enda meri benda basa ngagai orang ti ngulit ti dikumbai pemampul pending. Kabuah alai meri sida benda tu awak ka sida enda runggu ninga nyawa orang ti rami enggau ninga gendang gawai nya. Penyampau adat beri orang nya nitih ka pengalama tanggam ulit udah. Naka penyuah orang agi meri ulit benda tiga kali aja.

Pia mega laban rumah ti ngulit orang rumah bukai pen enti sida bisi kabuah mansa pengkalan orang nya enggau gendang enggau rami, sida enda tau enda meri rumah orang nya benda basa. Orang enda tau niki rumah orang ti ngulit bengepan ngena rawai, ngena tangkin, enti rumah nya enda begawai. Samoa orang ti bengepan niki rumah orang ti ngulit deka kena tunggu nitih ka adat ulit.

Tiga bulan terit orang udah mati, ulit iya diketas. Utai kena orang ngetas ulit nya isang ulih orang benyamai tuboh diri tauka belalang ngagai menoa jauh. Nambah ka nya antu pala pen tau ga kena orang ngetas ulit. Nyadi sabengkah agi enti orang nya baru udah dianjong ka pendam ka, angkat deh bisi orang baru pulai ngayau, ulit nya lalu tau diketas kamaia nya, enda iboh ka iya apin datai tiga bulan pengelama.

Nyadi maia hari orang muai ulit enti pagi agi tumu lalu enti lemai nyau baroh hari. Orang enggai ngetas ulit leboh hari agi bisa bendar panas. Kabuah pia laban enggai ka rumah angkat udah bekau ulit diketas.

Nyadi enti orang ngetas ulit enggau isang, orang ti ngetas iya diasoh nurun ka tanah ka dulu. Kejang iya deka niki ka rumah, iya lalu mangka ka rumah enggau panjong, munyi panjong orang ti pulai ngayau.

Nyadi enti orang ngetas ulit ngena pala lama, enti pala nya diketas ari jangkang iya, iya dulu dibiau enggau manok udah nya lalu digenselan enggau darah manok nya tadi. Uдах iya diketas pala nya dibai orang nurun ka tanah. Ditanah nyin nya baru orang ti mai iya manjong mangka ka rumah kejang pala nya dibai iya niki ka rumah.

Sereta datai isang tauka pala nya ba ruai orang ti empu ulit orang ti ngetas ulit lalu ngetas iya diruai. Uдах ulit diketas nya baru orang ti empu ulit ngasoh orang ti ngetas ulit nya ngetas ujong buok sida. Leboh buok sida diketas sida nyampi mimit minta diri gerai nyamai, gayu guru. Sereta ulit udah diketas orang lalu mangkong satawak ngena pangkong kumbai lubah-lubah ka tanda ulit udah diketas sereta enggau rumah nya pen nadai utai ngawa utai ngerepa agi.

NGAMBI TEBALU MATA

NYADI ENTI orang mati bini tauka mati laki nya dikumbai orang balu.* Nyadi sakumbang iya balu orang nya apin tau beganti baru enggau enda mega tau ngemujang tauka ngenara ka diri. Enti sema iya bisi gila orang leboh agi balu, iya kena tunggu kaban ari orang ti parai nitih ka adat tunggu tebalu. Tang enti iya semina udah bebaka udah begaya, iya dikupas orang enda bekuku enda bebulu, reti nya samoa benda ke dipinta orang diambi orang samoa.

Nyadi enti orang ngambi tebalu laban nyau maia orang ti balu nya patut dikupas patut diluas, lalu orang ke ngambi nya pen nadai ga sangka nadai ga kelala tebalu iya diambi orang

* Bacha ba jerita 'Sengalang Burong'.

nitih ka adat. Penyampau adat tebalu diambi orang enda sabaka, laban nya nitih ka pemagak orang ke udah parai nya diau dimenoa.

Nyadi ripih tebalu Iban baka tu. Enti orang ke parai nya tau serang tau pandang, tebalu iya enam belas igi jabir. Enti iya tau kayau tau pulau, tebalu iya lima belas igi jabir. Nyadi enti iya manok sabong, manok pukong, tebalu iya empat belas igi jabir, enti iya sereta endang pugu kalu orang menoa nya. Nyadi enti orang nya tansang manok gelanggang, tang iya nadai dengah, lalu enda tulih ka utai leboh enggau orang mindah enggau orang pegi, tebalu iya tiga belas igi jabir. Lepas nya tebalu ambi orang nitih ka gaya pendiau enggau pengawa iya diau dimenoa lalu ditambah ka enggau pematut ba umor orang ti parai. Naka pengemit tebalu diambi orang sigi panding.

Nyadi tebalu indu pen sebaka mega, tebalu indu takar, indu ga'ar, besai agi ari tebalu indu bukai. Lepas nya lalu ditangkan ka tebalu indu ke tau muntang tau nengkebang. Uдах nya ditangkan ka indu asi, indu ai, reti nya indu ke masai ruai alai orang begelumu, endor orang begempuru. Lepas nya baru ditangkan ka tebalu indu tubu, indu paku, indu temuai, indu lawai, reti nya orang ke endang masai betemuai masai alai orang datai, iya nya ukai orang ke tinggi batu tungku tauka rangka. Nyadi naka pemesai tebalu indu sapuloh igi jabir lalu pengemit iya sigi jabir.

Nyadi enti tebalu ambi orang ngena ati lantang, ati senang, semina utai dibai orang pulai sigi panding, ka tanda iya udah ngupas, udah ngeluar orang ti balu.

Uдах orang tembu bejako ka penyampau adat, orang ke diambi tebalu tadi lalu dilempai ka orang ti ngambi tebalu iya, kain mansau ba bau iya, udah nya lalu dibiau iya enggau manok enggai ka enda gerai enda nyamai tuboh nguan menoa.

TEBALU MANSAU

NYADI ORANG ti balu ngena tebalu mansau, tu orang ti balu enggai diambi tebalu enti enda maia iya merantu laki tauka bini iya ti udah parai. Maia orang ngupas orang ti ngena tebalu mansau nya kejang orang deka nganjong buloh pagi udah gawai antu nyadi. Pia mega orang ti diambi tebalu mata tadi, taja iya udah kena kupas nya ukai ngasoh iya enda mela orang ti udah parai enggau papan enggau rukan.

Abis.



Mr. Benedict Sandin, A.B.S., ada di Kerangan Pinggai dalam Paku, Saribas, dalam taun 1918. Ari taun 1928 ngagai taun 1935 iya besekula di Sekula St. Augustine di Betong, lalu ari taun 1935 ngagai taun 1939 iya besekula ba Sekula St. Thomas di Kuching.

Iya masok kereja perintah nyadi kerani dalam taun 1941. Dalam taun 1948 enggau 1949 iya bekereja di Kuching, Simanggang, Engkilili, Betong enggau Pusa. Dalam taun 1950 iya betukar ka Education Opis

keterubah mungkal nyadi Pengarang Surat Pembrita.

Dalam taun 1952 iya betukar ka Sarawak Museum nyadi Junior Assistant Curator. Ari ujong taun 1953 ngagai 1954 iya belajar di University College, Auckland, New Zealand. Iya mega belajar ka pengawa Museum di Wellington, Christchurch, Dunedin, Wanganui enggau Napier. Dalam taun 1956 iya terubah nyadi General Secretary ka Serakup Bansa Dayak Sarawak lalu dalam taun 1957 iya ditiki ka pangkat megai pengawa Research Assistant dalam Museum. Dalam taun 1963 iya enggau baum ka adat orang asal dalam Asia Timor Tenggara di Singapore University, enggau belajar ka pengawa Museum ka New Delhi, Srinagar, Agra, Sanchi, Ghopal enggau Bombay dalam India.

Dalam taun 1964 iya bulih Ahli Bintang Sarawak kategal pemagas enggau pengelandik iya nulis mairoh jerita dalam buku Museum, Sarawak Gazette enggau dalam tiga iti buku dikeluarka Borneo Literature Bureau.

Dalam taun 1965 iya di tiki ka pangkat nyadi Assistant Curator. Nambah ka nya iya mega jadi kaban dalam Sarawak Arts Council, Sarawak Government Examination Board enggau Malaysian Society of Orientalist. Iya mega enggau bejurai ka jerita tuai Asia Timor Tenggara di University of Malaya ba ujong taun 1965.

Nya alai laban iya landik bendar nulis jerita ka penguntong bansa kitai, tu ke empat iti buku udah ditulis iya.